

四庫全書

經部

欽定四庫全書

經部

春秋地名考畧卷十二至

詳校官監察御史臣劉湄

給事中臣溫常綬覆勛

總校官庶吉士臣倉聖脉

校對官助教臣羅萬選

謄錄貢生臣周培

欽定四庫全書

春秋地名攷畧卷十二

詹事府詹事高士奇撰

曹

國於陶丘

孔疏世本曹國伯爵譜云曹姬姓文王之
子叔振鐸之後也武王封之陶丘哀八年

曹人或夢衆君子立于社宮而謀亡曹曹叔振鐸
請待公孫彊杜註叔振鐸曹始祖詩譜曹者禹貢
兖州陶丘之北地名禹貢濟水東出于陶丘北孔
傳云陶丘丘再成也爾雅山再成曰陶成猶重也
李巡曰再成形再重也世紀曰舜陶于河濱丘因
以名墨子謂之釜丘竹書魏襄王十九年薛侯來

會王于釜丘是也桓五年州公如曹曹之名始見于經杜註曹國今濟陰定陶縣定四年祝鮀曰曹文之昭也晉武之穆也曹為伯甸非尚年也孔疏曹是晉之叔父而受伯爵居甸服非尚年齒鄭氏曰曹在濟陰定陶去王城八百里東都之畿方六百里侯服五百里定陶在畿外故曰甸服也其封域詩譜曰在雷夏荷澤之野昔堯遊成陽死而葬焉舜漁于雷澤民俗始化其風厚重多君子務稼穡薄衣食以致蓄積夾于魯衛之間哀八年宋公入曹以曹伯陽歸曹遂滅地入于宋為曹邑哀十四年向魍入于曹以叛是也戰國時齊楚魏共滅宋三分其地齊得濟陰曹地入馬仍謂之陶齊世家蘇代曰有陶平陸梁門不開韓非子魏安釐王攻盡陶衛之地是也後并于秦為穰侯邑所謂侵剛壽以廣其陶邑者秦置定陶縣二世二年沛公項羽攻定陶又章邯擊楚軍大破之于定陶項梁

死漢五年滅項羽還至定陶即位于汜水之陽既而封彭越為梁王都定陶後為濟陰郡治甘露中為定陶國治後漢濟陰郡亦治之晉初因之臣謹按杜預以濟陰定陶為曹國即指縣治甚明二漢志皆云定陶本曹國世紀亦云定陶西南有陶丘亭無異辭矣乃桑氏水經則又云南濟水過定陶南又東北荷水出焉又東北逕定陶恭王陵又東北逕定陶縣故城南是明有兩城蓋漢氏之末嘗徙邑治而史軼之也酈氏註曰定陶故城古三醜國也湯追桀伐三醜周武王封第叔振鐸為曹國范蠡既雪會稽之恥變姓名寓于陶為朱公即此則又明謂古曹國在故定陶城晉時已徙而杜即指邑治為曹國失于審細矣至于魏世定陶嘗置濟陽郡治隋屬曹州唐省縣為鎮宋復置今仍之是今日之定陶也其西有陶城城邑攷曰古曹國今定陶縣西古陶城是是曹國在定陶境今亦有

知其說者然攷其方位又與桑鄆不合豈晉魏之後縣治復有遷徙與要之不可攷矣又縣西十里
有陶邱縣北十五里有髡山志云曹國二十五世
皆葬此積壤髡髯如山故曰髡山有三醜亭寰宇
記云在今縣西南十里參攷遺迹曹在定陶其說
可信通釋云濟陰縣在東北三十七里即定陶故城曹
所都也宋濟陰縣在今曹縣西南六十里蓋亦指
陶城為曹都也或曰今曹州即古曹國也隋自
定陶移曹州治濟陰縣金大定二十七年河決曹
濮二十八年改築城于廢乘氏縣地移曹州及濟
陰縣治之其地即曹墟也明初省縣入州又以水
患再徙盤石鎮尋廢州為縣即今曹縣正統十年
復別置曹州于金人築城遺址故曹州為古曹國
其說似誤或云金人築城處在今曹州治東北二
里十八

洮

僖八年齊桓公盟諸侯于洮杜註洮曹地臣謹按僖公三十一年晉文公分曹地自洮以南東傅

于濟定十四年齊侯宋公會于洮即此亦曰桃城水經注甄子故瀆又東逕桃城因姚墟而名也援神契舜生姚墟應劭曰姚墟與雷澤相近世稱為姚墟今濮州西南五十里有洮城志云姚墟在東南九十里

曹南

僖十九年宋公曹人邾人盟于曹南杜註曹雖與盟而猶不服不肯致餼故不以國地而曰曹

南臣謹按孔穎達曰哀十二年傳曰諸侯之會侯伯致禮地主歸餼桓十四年公會鄭伯于曹傳曰曹人致餼禮也春秋諸侯會于國都者即以國都名為會地地主不序于列此地會于曹南則在曹之都在曹之都而曹猶在列是曹雖與盟心猶不服矣曹風侯人蒨薈兮蔚兮南山朝濟毛傳

云南山曹南山也今曹縣南八十里有曹南山然已不近曹都范氏曰曹南曹之南鄙是也

重丘

襄十七年衛孫蒯田于曹隧飲馬於重丘毀其瓶重丘人閉門而詬之衛伐曹取重丘杜註重

丘曹地

臣謹按六韜周志古亡國三十其中有

重丘國以美女遺青陽路史曰在曹州寰宇記重

丘在乘氏縣東北三十一里漢乘氏縣屬濟陰郡隋屬曹州唐宋因之金廢今乘氏故城在曹縣東

北五十里或云重邱在東昌此

齊地也杜氏明註兩國不可混

鄆

昭二十年曹公孫會自鄆出奔宋杜註鄆曹邑臣謹按孔疏鄆不繫于曹是大都也寰宇記云濟陰

乘氏縣西北有大饗城故老言古曹之鄆邑也大饗或作大鄉魏收志乘氏有大鄉城宋永初末北

魏將刁雍寇青州為青州所敗收散卒保大鄉山即此今曹縣北有大鄉城乘氏見上

郊

定十二年衛公孟彊伐曹克郊
杜註郊曹邑 或云在曹州界

黍丘

哀七年宋人伐曹築五邑于其郊曰黍丘
大城鍾邗杜註梁國下邑縣有黍丘亭 臣謹

按漢下邑縣屬梁國晉因之金改夏邑
今仍之屬歸德府後漢志有黍丘亭

揖丘

見上 或云
當在曹縣界

大城

見上 或云
當在曹州界

鍾邗

見上 或云
當在定陶界

虞

國於夏墟

孔疏譜云虞姬姓周太王之子泰伯之弟
仲雍是為虞仲嗣泰伯之後武王克商封

虞仲之庶孫以為虞仲之後處中國為西吳史記
武王求虞仲之後得周章已君吳乃封周章弟虞
仲于周之北故夏墟又曰予讀春秋古丈乃知中
國之虞與荆蠻勾吳兄弟也桓十年虢公出奔虞
始見于經杜註虞國在河東大陽縣地理志河東
大陽縣周武王封太伯後于此是為虞公孔穎達
曰志言泰伯後者以仲雍嗣泰伯故也僖二年官
之奇曰泰伯虞仲太王之昭也杜註穆生昭昭生
穆以世次計泰伯虞仲于周為穆僖五年晉人執
虞公虞遂亡戰國屬魏為吳城史記秦昭王伐魏
取吳城是也漢置大陽縣屬河東郡周天和二年
省大陽縣移河北縣治此隋屬陝州括地志故虞
城在河北縣東北五十里虞山之上唐天寶元年
陝郡太守李齊物鑿三門瀆以便漕得古鐮鉏上
篆平陸二字遂改縣曰平陸屬陝州金屬解州今
仍之縣東北六十里有古虞城再按古虞思國

杜註孔氏疏皆以為在梁國虞縣今已入陳地然亦有謂即在河東者詩云虞芮質厥成今平陸與芮城接壤寰宇記云平陸縣西六十里有虞芮所讓之閼原東西七里南北十三里此虞國周初尚存周書王會解曰天子立于堂上堂下之右唐公虞公南面立焉又史記解曰君媿于樂臣爭于權民盡于利有虞氏以亡虞仲得封夏墟蓋在古虞既亡之後也存之俟攷

共池

桓十年虞叔伐虞公公出奔共池 臣謹按寰宇記薄山在芮城縣北十里山海經云薄山之

首曰甘棗之山共水出焉西流至于河穆天子傳曰南登于薄山寘軫之隘謂之虞阪即顛軫阪也

共池或即共水矣

顛軫

僖二年晉伐虢假道于虞荀息曰冀為不道入自顛軫伐郟三門杜註前是冀伐虞至郟郟虞

邑河東大陽縣東北有顛陵阪臣謹按水經注
傅巖東北十餘里即顛陵阪也有東西絕澗中築
以成道指南北之路謂之幹橋橋之東北有虞原
原東即虞城博物記曰顛軫阪在大陽鹽池東吳
城之北今謂之吳阪亦謂之虞坂長二十里戰國
策曰騏驥止于虞阪而不能進是也今在平陸縣
東北五十里自上及下七山
相重東西絕澗至為險仄

鄭

見上臣謹按平陸縣東
北二十五里有故鄭城

三門

見上臣謹按水經河水東過砥柱間禹治洪
水山陵當道者鑿之故破山以通河三穿既鑿

有砥柱山有三門南為鬼門中為神門北為人
門臣愚則以為直
是鄭邑之三門耳

虢

國於上陽

僖五年宮之奇曰虢仲虢叔王季之穆也為文王卿士杜註虢仲虢叔王季之子文

王之母弟也仲叔皆虢君字晉語胥臣曰文王敬友二虢又曰詢于八虞而諮于二虢常昭曰善兄

弟為友賈逵曰虢仲封東虢制是也虢叔封西虢虢公是也孔穎達曰據傳鄭滅一虢晉滅一虢不知誰是仲後誰是叔後賈言無明證不可審知臣愚謂賈最近古且諸家所用不可易矣東虢別見

小國卷西虢初封在秦之雍地秦宣太后于此起虢宮漢置虢縣屬右扶風漢志雍為西虢是也後漢省入雍縣魏太延中置武都郡治此西魏又置洛邑縣隋廢郡改縣曰虢唐仍之元和郡縣志虢縣古虢國周文王弟虢叔所封是曰西虢蓋用賈說也宋亦因之九域志在鳳翔府南三十五里元

省入寶雞今其故城在寶雞東六十里西虢之君
在西周時嘗為王室卿士周語宣王不藉千畝虢
文公諫韋昭曰文公虢叔之後西虢也宣王都鎬
在畿內此又用賈說矣史記幽王時有虢石父竹
書紀年又有虢公翰不知其出于東西隱元年鄭
人以王師虢師伐衛始見于經杜註虢西虢國也
弘農陝縣東南有虢城蓋已從平王而東徙矣然
鄭語史伯謂鄭桓公曰當成周者西有虞虢王之
支子母弟也是平王前已徙東土不可攷矣秦本
紀武公十一年滅小虢蓋虢既東遷支庶之留于
雍者也今在寶雞東五十里亦曰桃虢城猶夫鄭
已東徙而留者為南鄭也隱三年鄭武公為平王
卿士王貳于虢杜註西虢公也八年虢公忌父始
作卿士于周桓五年王伐鄭以虢公林父將上軍
僖二年晉荀息假道于虞以伐虢五年晉侯圍上
陽滅虢虢公醜奔京師蓋見于春秋者有三公焉

杜註上陽虢國都在弘農陝縣東南上陽之虢亦稱郭公羊傳晉獻公曰吾欲伐郭則虞救之伐虞則郭救之是也蔡邕郭有道碑文曰王季之穆有虢叔者實有懿德文王咨之建國命氏或謂之郭此亦用賈說也班固則又謂之北虢漢志曰北虢在大陽是也大陽地在河北當是時虢都上陽而下陽則在河北大陽之境宜以其跨河之北而成周在河南故謂之北虢與上陽在漢陝縣地屬弘農郡晉仍之今在陝州東南杜佑云陝州之虢為北虢又云虢都在陝郡平陸縣今屬山西平陽府蓋欲附會北虢之義而顯與傳文違戾不可從矣臣謹按後漢志弘農陝縣本虢仲國河南滎陽有虢亭虢叔國九域志大紀從之與賈氏特異乃賈氏之說又見于虞翻常昭皆無異辭又馬融云虢叔同母弟虢仲封下陽異母弟虢叔封上陽孔穎達以為上陽下陽同是復虢國之邑不得分封

二人也若二人共處鄭其安所得虢國而滅之是矣乃以臣愚測之融所謂虢仲封下陽誠誤矣所謂虢叔封上陽則依然賈逵之說蓋古來相傳如是未可輕非也惟是杜預明云皆母弟而馬氏分同母異母其意蓋謂西虢大而東虢小不應弟封大國兄反封小國故以同母異母別之不知周室班爵尚德不尚年祝鮀論之詳矣又

玕

莊二十一年王巡虢守虢公為王宮于玕杜註玕虢地在今河南滎池縣界

莘

莊三十二年有神降于莘內史過曰虢將亡杜註莘虢地臣謹按今陝州破石鎮西十五里莘原

是也

渭汭

閔二年虢公敗犬戎于渭汭杜註渭水出隴西東入河水之隈曲曰汭臣謹按釋例曰渭水

出隴西狄道縣鳥鼠同穴山東經南安天水汧陽扶風始平京兆至弘農入河益渭水入河處乃虢之境也

下陽

傳二年虞師晉師滅下陽杜註下陽虢邑在河東大陽縣臣謹按下陽公穀皆作夏陽穀梁

傳非國而曰滅重下陽也夏陽者虞虢之塞邑滅夏陽而虞虢舉矣胡氏曰猶秦有潼關蜀有劍閣皆國之門戶徐彥曰虢之滅由于下陽之止郢之入由于州來之亡故皆書滅張氏曰下陽與上陽對在陝州平陸縣上陽在陝縣虢都也今平陸縣東五十里有大陽城大陽東北三十里有故下陽城其地有虞阪之險晉欲伐虢慮虞人要而擊之欲伐虞則虢又救之以為外扞滅下陽而兩國皆失其險矣

桑田

僖二年虢公敗戎于桑田杜註桑田虢地在弘農陝縣東北臣謹按桑田即稠桑也魏主修

奔關中至稠桑隋義寧初劉文静遣將竇琮自潼關追屈突通至稠桑執之又高祖詔李密招撫山東至稠桑驛復止之密因入桃林以叛即此今閩鄉縣東三十里有稠桑驛

邾

國於邾

孔疏譜云邾曹姓顓頊之後有陸終產六子其第五子曰晏安邾即其後也武王克商封

其苗裔挾于邾為附庸居邾隱元年公及邾儀父盟于蔑是為十三世邾子克始見于經杜註邾今魯鄒縣公羊禮記亦稱邾婁註曰婁力俱反邾入語聲後曰婁故曰邾婁其地在鄒山近魯哀七年茅成子曰魯擊柝聞于邾劉蒼鄒山記曰邾城在山南去山三里魯繆公改國號曰鄒以山為名也

鄒亦作騶趙岐曰鄒本邾子之國至孟子時改號曰鄒然春秋時亦有稱騶者鄭語史伯曰曹姓鄒也故曰去聖人之居若此其近漢置騶縣屬魯國或曰秦置漢因之晉屬魯郡晉咸和初石趙將石瞻攻河南太守王瞻于邾拔之胡氏曰即故邾城亦謂之鄒山宋為魯郡治元嘉中魏主燾南侵自東平趣鄒山李孝伯謂宋張暢曰鄒山之險君家所憑是也隋屬兗州唐因之金屬滕州明屬兗州府杜氏通典鄒山周四十里在縣東南今縣治為宋時所徙古邾城在縣東南二十六里

遷於繹

文十三年邾文公卜遷于繹史曰利于民而不利于君邾子曰苟利于民孤之願也遂遷

于繹五月邾子克卒君子曰知命杜註繹邾邑魯國鄒縣北有繹山徙都于彼山旁山旁當有舊邑

也邾既遷都于此竟內應別有繹邑宣十年公孫
歸父帥師伐邾取繹公羊作類必非取其國都當
是取其別邑耳哀七年魯師入邾處其公官邾衆
保于繹杜註繹邾山也是則棗城而栖山矣禹貢
徐州之貢嶧陽孤桐孔疏引下邳縣西之葛嶧山
疑誤詩保有鳧繹遂荒徐宅毛傳云二山名蓋嶧
與繹通也史記始皇二十八年東行郡縣上鄒嶧
山諸儒刻石紀秦功德其所刻石嶺名曰書門鄒
璞曰繹山純石積構連屬如繹然故名水經注
嶧山東西二十里高秀獨出積石無土壤孔穴洞
達往往如數間屋俗謂之嶧孔避難者多就之晉
永嘉之亂太尉郝鑿將鄉曲逃于此今山南有大
嶧名曰郝公山北有紀巖即秦立石處也宋元嘉
中魏主南侵踣而仆之按疏稱邾即鄒縣嶧山在
北而今之嶧山在縣東南二十五里蓋古時縣治
在山南而今則徙于山北也又山之西南有故縣

村即鄒縣舊治可知文公徙都不過稍北數里耳
邾至戰國時為楚所滅楚宣王遷其遺民于弦黃
之間謂之邾城漢初吳芮為衡山王都邾孫曹時
稱江北巨鎮晉咸和中豫州刺史毛寶重兵戍之
為石趙所陷
其地遂墟

翼

隱元年公子豫及邾人鄭人盟于翼杜註翼邾地
南
臣謹按翼在沂州費縣西南九十里故武城之

偃

僖二年公敗邾師于
偃或曰在費縣南

虛丘

傳公敗邾師于偃虛丘之戍將歸者也杜註虛
丘邾地邾人戍虛丘欲以侵魯公要而敗之

臣謹按服虔云虛丘魯地魯有亂邾使兵戍虛丘
魯要而敗之所以惡僖公也杜以為不然故別為

說或曰虛丘
在費縣界

魚門

僖二十二年公及邾人戰于升陘我師敗績邾人獲公冑懸諸魚門杜註魚門邾城門臣謹

按又有范門哀七年魯伐邾及范門猶聞鐘聲是也

訾婁

僖三十三年公伐邾取訾婁或曰在濟寧州界

狐駘

襄四年滅孫統侵邾敗于狐駘杜註魯國菑縣東南有目駘亭臣謹按傳曰國人逆喪者皆

鬻魯于是始鬻檀弓曰魯婦人之鬻而弔也蓋自戰于臺駘始也臺駘即狐駘哀二十七年越子使

后庸來聘言邾田封于駘上即此漢蕃縣一作蕃應劭曰音皮屬魯國白褒魯國記曰汝南陳子游

為魯相蕃子也國人避諱遂改為皮音晉屬魯郡隋改置滕縣金置滕陽軍改滕州明廢州存縣屬

兗州府縣東南二十里
有孤駘山

漆

襄二十一年邾庶其以漆閭丘來奔杜註二邑在
高平南平陽縣東北有漆鄉西北有顯閭亭臣
謹按定十五年城漆即此南平陽縣見
魯地平陽今鄒縣北有漆城一名漆鄉

閭丘

見上臣謹按漆鄉西北有
顯閭亭即閭丘或云在縣南

蟲

昭十九年邾人邾人徐人會宋公
同盟于蟲邾地在濟寧州東境

離姑

昭二十三年邾人城翼還自離姑武城人塞其
前杜註離姑邾邑臣謹按孔穎達曰邾魯接

連境界相錯邾人從翼邑還邾先徑魯之武城然
後始至離姑而後至邾今其地在費縣故武城之

南

濫

昭三十一年黑肱以濫來奔杜註東海昌慮縣臣謹按左傳言邾黑肱以濫來奔而經不書邾穀

梁傳曰別乎邾也其不言濫子何也非天子所封也范甯曰邾以濫邑封黑肱故別之若國公羊傳亦謂叔術讓國受邾五分之一而為濫國來奔者其後人也孔穎達非之以為直闕文耳漢置昌慮縣于此屬東海郡宣帝封魯孝王子為侯邑後漢建武五年董憲與劉紆悉兵數萬人屯昌慮曹魏嘗析置昌慮郡尋罷元康中改屬蘭陵郡北齊廢後周大象二年徐州將席思羅攻陷昌慮以應尉遲迥隋大業十年彭城留守董純敗賊張大虎于昌慮即其故城矣今昌慮城在滕縣東南六十里

鄒東

見魯地鄒

沂西

小沂水也見魯地沂上

絞

哀二年伐邾將伐絞杜註
絞邾邑在今滕縣北

范門

見前
魚門

茅

哀七年邾茅戍子以茅叛杜註
高平西南有茅鄉亭 見茅國

莒

國於莒

孔疏譜云莒嬴姓周武王封茲與期于莒初
都計後徙莒世本曰莒已姓丈七年穆伯奔

莒從已氏也又云紀公以下為已姓不知誰賜之
姓者國語史伯又曰曹姓鄒莒未知孰是隱二年

莒人入向是為十一世茲丕公始入春秋杜預註
莒國今城陽莒縣共公已後微弱不復見戰國時

莒簡王滅莒而地歸于齊燕使樂毅破齊獨莒即
墨不下齊緡王走莒淖齒殺之子襄王保莒五年

田單以即墨攻破燕軍襄王自莒復入于齊亦曰
城陽戰國策燕襲齊墟王走城陽山中又楚考烈
王八年遷魯于莒而取其地漢二年田榮為楚所
滅第橫復起城陽四年韓信破齊齊相田光走城
陽既而韓信追獲齊王廣于城陽復置莒縣屬齊
國文帝封朱虛侯章為城陽王後漢城陽國廢改
屬琅邪國建安三年曹操折置城陽國晉因之劉
宋改東莞水經注沫水出琅邪東莞縣西北已又
東南過莒縣東其城三重並悉崇峻惟南開一門
內城方十二里外城周二十里郭周四十餘里列
女傳齊人杞梁夔莒戰死其妻哭于城下七日城
為之崩即此尸子曰莒君好鬼巫而亡無知之難
小白奔馬樂毅攻齊守嶮全國隋屬莒州唐宋屬
密州金為城陽軍已升州又改莒州元仍之明省
附郭莒縣入州元至元中叅政馬睦火鎮莒以城
大難守截東北隅為子城周五里再按地志莒

國之外復有三莒一為周莒一為齊莒一為魯之莒父各見本國地中

初封介根

即計也應劭曰周武王封茲輿期于此即莒之先也春秋初徙于莒襄二十四年齊

侯伐莒取介根杜註介根莒邑今城陽黔陬縣東北計基城是也漢置計斤縣屬琅邪郡顏師古曰計斤即介根語音有輕重如淳曰斤音基後漢省今膠州西南五里有介根城有雙塢對立曰東西計邱宋白曰計斤城在高密縣東南四十里

密

隱二年紀子伯莒子盟于密杜註城陽淳于縣東北有密鄉臣謹按漢有密鄉縣屬北海郡文帝封膠東頃王子林為邑侯後省後漢志北海淳于縣有密鄉應劭曰淳于東北六十里有平城亭又四十里有密鄉亭故縣也淳于見杞國

鄆陵

文十七年公孫敖如莒及鄆陵杜註
莒地 或曰在今莒州沂水縣界

渠丘

成八年渠丘公立于池上杜註渠丘公莒子朱也渠丘邑名莒縣有遂里 臣謹按孔穎達曰

十四年書莒子朱卒蓋渠丘公即是朱也夷不當有謚或作別號此以邑名為號不知何故成九年楚子重自陳伐莒圍渠丘渠丘城惡泉潰奔莒楚師圍莒莒城亦惡莒潰楚遂入鄆浹辰之間楚克其三都蓋地相近也漢北海安丘縣孟康曰古渠丘也後漢志亦曰安丘有渠丘亭晉地道記曰有渠丘城伏琛齊記渠丘亭在安丘東北十里但非莒縣境與杜氏不合然地自相隣也晉安丘屬東莞郡齊廢隋復置自隋迄五代時有變改宋仍曰安丘屬密州今屬青州府

鄆

見魯地

且于

襄二十三年齊侯襲莒門于且于明日復戰期于壽舒杞殖華還載甲入且于之隧宿于莒郊

明

日先遇莒子于蒲侯氏杜註且于莒邑隧狹路臣謹按孔穎達曰既入而又得出宿知所入非

城

邑也故杜以為狹道檀弓載此事云齊莊公襲莒于奪杞梁死焉奪當為地名鄭氏曰隧奪聲相

近

非也當是且于之旁別有奪地耳或曰且于在安丘縣境

壽舒

見上杜註壽舒莒地或曰亦在安丘境

蒲侯氏

見上杜註近莒之邑

大廐

昭元年莒務婁晉胡以大廐及常儀靡奔齊杜註大廐常儀靡莒二邑或曰二邑在莒州北

境

常儀靡

見上 臣謹按高辛氏之第四妃有厥氏曰常儀見大戴禮厥與聚聊相近疑古諸侯之

在東

國者

防

昭五年莒牟夷以牟婁及防茲來奔杜註城陽平昌縣西南有防亭 臣謹按牟婁見杞地漢平昌

縣屬琅邪郡後漢屬北海國晉屬城陽郡後齊廢入安丘縣今安丘縣西南六十里有故平昌城防

亭亦在

縣西南

茲

見上杜註姑幕縣東北有茲亭 臣謹按漢姑幕縣屬琅邪郡後漢屬城陽郡後齊廢今諸城縣西

四十里有姑幕

城茲亭在其境

紀鄆

昭十九年齊高發伐莒莒子奔紀鄆杜註紀鄆莒邑也東海贛榆縣東北有紀城 臣謹按紀

郭一名紀本傳莒有婦人莒子殺其夫已為廢婦
及老托于紀郭紡焉以度而去之及師至則投諸
外師夜緇而登莒共公懼啟西門而出齊師入莒
是也孔疏此紀即上紀郭釋例土地名莒地有紀
郭紀二名南北朝為戍守處蕭齊建武二年青冀
二州刺史王洪範遣軍主崔延讓襲魏紀城克之
城邑攷紀城周一里近海賴榆漢縣屬琅邪郡後
漢屬東海郡晉宋因之今屬海州縣北七十五里
有古紀
郭城

鄭

昭十年季孫意如伐莒取鄭杜註鄭莒邑 臣謹
按昭十二年莒人以取鄭之後愬于晉十三年為
取鄭故晉將以諸侯來討遂合諸侯于平
丘然自是鄭屬魯矣或曰在沂水縣界

壽餘

昭二十二年莒敗齊師于
壽餘 或曰在莒州北境

向

僖

二十六年公會莒子衛甯速盟于向杜註莒地

臣謹按宣四年公會齊侯平莒及邾莒人不肯

公伐莒取向杜註向莒邑東海丞縣東南有向城
遠殺也又襄二十年仲孫速會莒人盟于向皆此

也古丞縣在今嶧縣西北一里去莒果遠寰宇記
曰莒州南七十里有向城近沂州西南百里有向

城參會道里差為近之再按桓十
六年城向或謂莒地而魯斃取之

杞

國於淳于

史記陳杞世家杞東樓公者夏后禹之苗
裔也殷時或封或絕周武王克殷紂得東

樓公封之于杞以奉夏后祀禮記言偃曰杞之郊
也禹也宋之郊也契也是天子之事守也孔子曰

吾欲觀夏道是故之杞而不足徵也吾得夏時焉
詩振鷺序二王之後來助祭也箋謂杞也宋也周

語富辰曰杞鄆由太姒韋昭曰杞鄆姒姓太姒文王之妃武王之母僖十四年衛遷于帝丘衛成公夢康叔曰相奪子享公命祀相甯武子曰不可鬼神非其族類不歆其祀祀鄆何事相之不享于此久矣杜註相夏后啟之孫居帝丘祀鄆夏後自當祀相凡此皆祀之先世見于經傳者也其爵吳萊曰杞公爵也桓二年書杞侯莊二十七年書杞伯自是皆以伯書惟僖二十三年二十七年書杞子傳曰用夷禮襄二十九年復書杞子傳曰賤之也孔穎達曰用夷禮故賤之程子曰杞二王之後不應伯爵疑前世黜之也中間從夷故子之殆不可曉其地宋忠曰在陳留雍丘縣漢雍丘縣今杞縣也詳見宋地不知何時遷于東土班固曰春秋時徙魯東北是也隱三年經書莒人伐杞取牟婁是為杞武公三十一年也始入春秋杜註杞國本都陳留雍丘縣推尋事跡桓六年淳于公亡國杞似

并之襄二十九年晉入城杞之淳于杞又遷都淳于臣謹按桓五年冬經書州公如曹傳曰淳于公度其國危遂不復六年春經書寔來傳曰自曹來朝書曰寔來不復其國也其稱公者公羊曰天子三公稱公王者之後稱公服虔曰春秋前以黜陟之法進爵為公胡氏曰州公諸侯而稱公者昔畢高以父師而保釐東土衛武公以列國而入相于周與後世出入均勞之義同蓋以為天子三公也世本曰州國姜姓蓋自此滅矣襄二十七年傳晉平公杞出也故治杞知悼子合諸侯之大夫以城杞蓋悼公夫人為杞孝公之女而是時之當國者趙文子也昭元年祁午數趙文子之功曰城淳于用是知城杞即城淳于本州國之都而杞居之用是知亡州者杞也若夫隱三年則州未亡不知杞所居乃莒人所取之牟婁則在東土與淳于為隣杞本弱小不應立國雍丘而遙屬小邑于千數百

里之外也用是春秋之前杞早居于東土矣城杞之歲女叔齊曰杞夏餘也而即東夷邾莒以東皆東夷也僖十九年宋公使邾子用郕子于次睢之社以屬東夷是也子太叔曰晉不惜周家之闕而夏肄是屏社記夏肄杞也肄餘也屏城也孔疏方言云肄柝餘也秦晉之間曰肄鄭氏曰斬而復生曰肄杞是夏後滅而復存猶木之柝生小莪也即杞遷東土之證特不能詳其事耳淳于杜註州國所都今城陽淳于縣也水經注汶水出朱虛縣又北過淳于縣西故夏之斟灌國周武王以封淳于公號曰淳于國春秋州公是也其城東北則兩川交會處蓋濰水亦至此會汶而入于海也斟灌似誤別見本國自杞居之後人亦曰杞城漢置淳于縣屬北海郡後漢初省永元九年復置屬北海國建安十六年曹操東擊海賊管承至淳于承走入海島晉改屬城陽國劉宋改入高密郡後屬平

昌郡後齊廢入高密縣今其廢城在安丘縣東北三十里

遷於緣陵

僖十二年會于鹹淮夷病杞故十四年諸侯城緣陵杜註緣陵杞邑左傳諸侯城緣

陵而遷杞焉杜註不言城杞杞未遷也公羊傳曰孰城之城杞也曷為城杞滅也孰滅之蓋徐莒魯

之孰城之桓公城之陸氏曰明年楚伐徐諸侯救徐公羊之繆可知家氏曰杞未嘗受兵左氏言病

杞為得實臣謹按是時蓋杞已居淳于矣迨近淮夷是以病之徐莒脅杞經傳無文不可從也惟齊

桓遷杞之說為胡文定所本當用之漢志北海郡有營陵縣應劭曰即師尚父所封之營丘薛瓚非

之曰營丘即臨淄營陵春秋謂之緣陵是也蓋齊桓遷杞以自近如楚遷許于葉吳遷蔡于州來也

然杜云杞地則仍為杞地之錯入于齊者耳高帝封劉澤為營陵侯後漢晉因之北齊省隋復置唐

武德初營陵民汲嗣率鄉人拒賊于此權置杞州以春秋時杞嘗徙治此也尋廢今其故城在昌樂縣東南五十里或曰緣陵在今諸城縣界襄二十七年杞復遷淳于戰國初為楚惠王所滅

牟婁

見首條杜註牟婁杞邑城陽諸縣東北有婁鄉臣謹按牟婁自是屬莒昭五年莒牟夷以奔

魯後漢志北海平昌有婁鄉水經丘涓水東北流逕婁鄉城東入濰漢諸縣屬琅邪郡晉屬北國今在諸城境平昌今在安丘境蓋二縣接壤也今諸城東北有婁鄉城

無婁

宣十五年仲孫蔑會齊高固于無婁杜註無婁杞邑臣謹按公羊作牟婁蓋即莒人所取也

然此時已為莒邑而杜註杞邑未詳

紀

國於紀

孔疏世族譜紀姜姓侯爵桓九年書紀季姜歸于京師是也隱元年紀人伐夷始見于經

桓五年齊鄭朝紀欲以襲之紀人知之六年公會紀侯于郟咨謀齊難也冬紀侯來朝請王命以求成于齊公告不能莊元年齊師遷紀郟郟杜註齊欲滅紀故遷其三邑之民而取其地蘇氏云直取其地不取其民故不言所往之處志在去之而已三年紀季以鄆入于齊左傳紀于是乎始判杜註齊欲滅紀故紀以鄆入齊為附庸公羊曰請後五廟以存姑姊妹穀梁曰鄆紀之邑也入於齊者以鄆事齊也胡氏曰紀季所以不書奔者有紀侯之命矣四年紀侯大去其國左傳曰紀侯不能下齊以與紀季大去其國遠齊難也公羊曰大去者何滅也孰滅之齊滅之復仇也何仇爾遠祖也哀公烹乎周紀侯諧之幾世乎九世矣穀梁曰大去者不遺一人之辭言民之從者四年而始畢杜註

季奉社稷故不言滅大去不返之辭然自是紀已
亡矣春秋不書滅特以義存之焉爾成二年齊侯
使賔媚人以紀獻玉磬賂晉杜註獻玉甌皆滅紀
所得是也其地杜註曰紀國在東莞劇縣水經注
巨洋水北逕劇縣故城古紀國也劉昭曰劇縣西
有紀城亦曰紀亭城內有臺俗曰紀臺戰國時為
齊之劇邑魯仲連曰劇胸之人辨是也漢因置劇
縣屬齊國後屬北海郡後漢初為張步所據建武
五年耿弇平之帝幸劇尋為北海國三國魏屬東
莞郡晉因之北齊省今其故城在青州壽光縣東
三十里又有紀城亦在縣東南再按城冢記鄒
縣東南二十五里有紀城及紀侯冢相傳為紀侯
去國避
難處

浮來

隱八年公及莒人盟于浮來左傳以成紀好也
杜註浮來紀邑東莞縣北有邳鄉邳鄉西有公

來山號曰邳來間 臣謹按水經注沂水東逕浮來之山即公來山也浮來水注之其水左控三川右會甘水而注于沂今蒙陰縣西北有浮來山

邾

見首條杜註邾在東莞臨朐縣東南 臣謹按應劭曰邾一作駢後為齊大夫伯氏邑管仲奪伯氏

鄆

駢邑三百即此文帝封孫鄆為瓶侯孝景時國除武帝封菑川靖王子成為駢侯今在臨朐縣東南見首條杜註都昌縣西有訾城 臣謹按鄆亦讀訾本一城也唐武德二年置訾亭縣屬濰州六年

廢俗呼為瓦城半為水漸今在昌邑西北三十里一云訾城在縣西北十五里又十五里為鄆城都昌漢縣今為昌邑故城在縣西

郿

見首條杜註朱虛縣東南有郿城 臣謹按漢置郿城縣屬琅邪郡後漢廢後魏于故郿城置郿北

齊廢改置琅邪縣隋仍改為郚城尋廢今安丘縣西南六十里有郚山四面險絕其上寬平約數百里有古城遺址即郚城也晉朱虛縣在臨朐縣東六十里

郚

見首條杜註郚紀邑在齊國東安平縣臣謹按國語齊桓公初立正封域東至于紀郚蓋特存之也莊十二年紀叔姬歸于郚叔姬者魯女伯姬之娣隱二年伯姬歸于紀叔姬待年于國不與嫡俱行至七年乃歸于紀杜氏曰紀侯去國而死叔姬歸魯紀季自定于齊而後歸之孔疏曰紀季雖為附庸猶得專郚故可歸也劉昭曰安平有郚亭徐廣曰安平即古郚邑也齊世家平公割齊安平以東為田成封邑潘王末燕師入齊齊田單走安平既而齊襄王封田單為安平君是也漢置東安平縣屬菑川國後屬北海國晉改屬齊國北齊廢今臨淄縣東十九里有安平城又有郚亭亦在縣東

許

國於許

孔疏譜云許姜姓與齊國同祖堯四岳伯夷之後也周武王封其苗裔文叔于許隱十一

年公及齊侯鄭伯入許是為文叔後十一世許莊公始入春秋本傳鄭莊公曰許太岳之裔也杜註太岳神農之後國語富辰曰申許齊呂由太姜章昭曰四國皆太岳之後太姜之家也其地為夏伯昆吾氏之墟昭十二年楚靈王曰昔我皇祖伯父昆吾舊許是宅是也鄭莊公既入許遷許莊公之弟許叔于東鄙而使公孫獲處許西偏鄭莊公卒鄭亂許叔乃復入于許僖六年楚人圍許許僖公因蔡以復于楚邲之戰靈公乘楚車其後又屢受兵于鄭遂遷于楚境許既遷鄭有其地謂之舊許見鄭地杜註許潁川許昌縣臣謹按秦置許縣屬潁川郡陳勝將伍逢軍于許章邯擊破之是也漢

仍之地理志曰故許國文叔所封後漢章帝封馬
光為侯邑建安元年獻帝都此魏黃初二年改曰
許昌為五都之一歲嘗臨幸每伐吳命司馬懿留
鎮于此明帝太和六年如許昌治許昌宮晉為潁
川郡治永嘉末荀組建行臺于此後陷于石勒自
是屢得屢失一陷于苻秦再陷于慕容燕又陷于
姚秦義熙十二年劉裕伐秦先鋒檀道濟克許昌
後復為魏所陷毀其城而去東魏天平初始分潁
川置許昌郡北齊郡廢隋屬許州唐因之五代唐
諱昌改許田縣宋熙寧四年省入長社為許田鎮
今許州即古長社縣故
許城在州東三十里

遷於葉

成十五年許遷于葉 臣謹按本傳許靈公
畏鄭偁請遷于楚楚公子申遷許于葉襄十

六年晉平公即位許男請遷于晉諸侯遂遷許
大夫不可晉人歸諸侯鄭伯會諸國之大夫以伐

許討其未遷也襄二十六年許靈公如楚請伐鄭曰師不興孤不歸矣杜註十六年晉伐許獨鄭伯自行故許恚欲報之既而許靈公卒于楚楚為之伐鄭而後葬許靈公蓋許雖遷猶在方城之外鄭患未已也昭四年楚子滅賴欲遷許于賴使鬬韋龜公子棄疾城之卒不行棄見楚地中

又遷於夷

昭公九年許遷于夷杜註許畏鄭欲遷也臣謹按本傳楚公子棄疾遷許于夷實

城父取州來淮南北之田以益之伍舉授許男田孔疏州來邑在淮南民有田在淮此許國盡遷于夷夷田少故取以益之十三年傳楚子之為令尹也遷許而質許圍杜註遷許在九年圍許大夫即此時事也夷城父見楚地中

又遷於白羽

昭十八年許遷于白羽杜註自葉遷也許畏鄭樂遷臣謹按本傳楚左尹王

子勝言于楚子曰許于鄭仇敵也而居楚地以不
禮于鄭晉鄭方睦鄭欲伐許而晉助之楚喪地矣
君盍遷許許曰余舊國也鄭曰余俘邑也葉在楚
國方城外之蔽也土不可易國不可小許不可俘
仇不可啟君其圖之楚子說使王子勝遷許于折
實白羽此許遷白羽之由也孔穎達曰昭十三年
傳曰楚子滅蔡遷許胡沈道房申于荆焉平王即
位既封陳蔡而皆復之禮也註云荆荆山也滅蔡
在十一年許又從夷遷于荆山平王復之還其本
國許又歸于葉也且傳云葉在楚方城外之蔽明
其欲遷之時許當在葉故杜云自葉遷也再按
杜註又云十五年平王復遷邑許自夷還居葉孔
疏曰許既自夷遷荆即當自荆向葉杜以經書許
遷于夷故據以為言其實自荆遷也復遷邑在十
三年杜作十五年亦
誤白羽詳見楚地中

又遷於容城

定四年許遷于容城容城即漢之華容城今為監利縣非也

臣謹按應劭曰

哀六年鄭游速帥師滅許以許男斯歸左傳云因楚敗也此時昭王新復國華容近在國都之側鄭亦宜能至此或曰容城即在葉縣西差為近理耳又哀元年許男復從楚圍蔡似未嘗滅或言楚復封之其後不知所終

展陂

成四年鄭公孫申帥師疆許田許人敗諸展陂鄭伯伐許取鉏任冷敦之田杜註展陂許地

臣謹按今在許州西北

鉏任

冷敦

見上亦在許州境

械林

函氏

襄十六年晉伐許次于械林又伐許次于函氏杜註械林函氏皆許地臣謹

按此許即葉也昭九年傳曰遷許于夷遷方城外
人于許杜註許遷于葉因謂之許是也或云棧林
在今葉縣東北函
氏亦在葉縣北

滕

國於滕

孔疏譜云滕姬姓文王子錯叔繡之後隱九
年書滕侯卒是為叔繡後十七世宣公也始

見于經隱十一年滕侯薛侯來朝爭長滕侯曰我
周之卜正也意以得仕王朝為貴定四年祝鮀曰

武王母第八人周公為太宰唐叔為司徒聃季為
司空五叔無官宣尚年哉杜註以管蔡邲霍毛為

五叔蓋謂文昭十六前八同母後八異母也叔繡
次在後母中卜正亦未必當其身而滕侯云然意

亦與祝鮀同耳昭四年渾罕曰蔡及曹滕其先亡
乎服虔注曰齊景亡滕孔穎達非之謂史記言春

秋六世楚滅滕是也夫孟子時且有滕服言之謬可知矣竹書云威烈王十一年於越子滅滕亦誤其地杜註滕國在沛國公丘縣臣謹按秦置滕縣漢高祖封夏侯嬰為滕公尋改置公丘縣屬沛郡地里志曰故滕國也武帝封魯恭王子為侯邑晉屬魯郡後廢今滕縣乃漢之蕃縣隋改曰滕金置軍尋改州明降為縣屬濟南府古滕城在縣西南十四里志云其城周二十里中有子城

薛

國於薛

孔疏譜云薛任姓黃帝之苗裔奚仲封為薛侯武王復以其胄為薛侯隱十一年滕侯薛

侯來朝始入春秋本傳滕侯薛侯爭長薛侯曰我先封杜註夏所封在周之前定元年薛宰曰吾祖奚仲居薛為夏車正奚仲遷于邳仲虺居薛以為湯左相杜註奚仲為夏禹掌車服大夫蓋春秋諸

國傳世之舊者莫薛若也昭十年禘竈曰顛項之墟姜氏任氏寔守其地杜註顛項之墟元柁也姜齊姓任薛姓與齊大小相去遠甚乃得並稱知其前世非小弱矣世本黃帝二十五子得姓者十二人任居其一詩曰摯仲氏任自彼殷商曰嬪于京國語富辰曰摯疇之國由太任又曰鄆之亾由仲任隱公曰寡人若朝于薛不敢與諸任齒孔疏引氏族篇曰謝章薛舒呂祝終泉畢過十國皆任姓也又知任氏支封本廣特不可盡攷耳其地杜註曰薛魯國薛縣臣謹按孔穎達曰薛自齊桓霸諸侯默為伯獻公始與魯同盟小國無記世不可知亦不知為誰所滅或曰戰國時齊滅之也田嬰封于薛謂之薛公秦置薛縣二世二年沛公命雍齒守豐自引兵之薛又項羽以朱雞石敗自湖陵引兵入薛召諸別將會薛計事漢置薛縣屬魯國晉屬魯郡劉宋屬彭城郡後魏因之後齊廢括地志

薛城在薛河北周二十八里堅厚無比地道記奚仲冢在城南二十里山上皇覽曰靖郭君冢在城東南陬孟嘗君冢在城中向門東北邊今薛城在滕縣南四十里又有仲虺城在薛城西三十里俗謂之斗城潞水經其北西北入泗再按哀十四年傳齊陳恒執其君壬寅于舒州尋弑之史記齊世家田常執簡公于徐州曰此事也賈逵曰徐州陳氏邑崔駰曰即春秋舒州也後漢志薛縣本國六國時曰徐州竹書紀年邳遷于薛改名徐州意謂仲虺自邳徙故薛得兼名徐州也春秋末薛尚在當是齊侵其近都之地別置舒州以封陳氏耳史記句踐平吳北渡淮與齊晉諸侯會于徐州齊威王曰吾吏有黔夫者使守徐州宣王八年興魏襄王會徐州以相王十年楚圍我徐州楚世家威王七年伐齊敗之于徐皆此也再按竹書紀年梁惠成王三十一年邳遷于薛謂之上邳竹書紀

事與諸家多互異。惠成王之下書。今王即襄王也。則惠成王即史記所云惠王。其三十一、年為周顯王二十九年。上距春秋終一百四十二年。後二十年齊封田嬰于薛。此時薛已將亡矣。或有奚仲之別裔自邳轉徙于宗國。因易其名。亦未可知。然恐即仲虺徙薛之事。訛為後世耳。漢呂后三年封楚元王子郢客為上邳侯。即此。

邳

見上。臣謹按昭元年趙孟曰：商有妣邳。杜註：二國商諸侯。邳下邳縣。即此也。應劭曰：邳在薛後。徙此。故曰下邳。薛瓚曰：有上邳。故云下邳。太康地記：奚仲遷于邳。謂之下邳。或以為自北遷。此故謂之下邳。依此諸條。則薛兼邳名。本在仲虺之前。薛兼徐名。乃在仲虺之後。蓋以證竹書之謬也。後仲虺還薛。而他族繼處之。得罪于商。遂有妣邳之名。處于三苗。觀扈馬秦置下邳縣。屬邳郡。二世二年項

梁西渡淮軍于下邳是也漢初封韓信為楚王都
下邳後為縣屬東海郡後漢初董憲據之尋棄去
建武五年帝徇彭城下邳永平十七年改置下邳
國于此建安初先主為徐州牧屯下邳呂布襲取
之三年曹操破斬布于下邳四年先主取徐州留
關羽守下邳尋為操所敗魏晉皆為下邳國晉永
興二年琅邪王睿監徐州軍事留守下邳尋没于
石勒又没于苻堅太元九年謝玄復取之自後迭
屬南北周置下邳郡兼置邳州隋廢郡唐又罷州
縣屬泗州宋置淮陽軍金仍曰邳州自漢迄元所
置國郡軍州皆治下邳縣明省縣入州北征記下
邳城三重外城周十二里南城白門樓曹操斬呂
布處也

小邾

國於郟

譜云小邾邾俠之後也夷父顏有功於周其子友別封為附庸居郟世本邾顏居邾肥徒

郟宋忠曰邾顏別封小子肥于郟為小邾子孔穎達曰世本言肥杜譜言友當是一人莊五年郟黎

來來朝始見于經杜註附庸國也黎來名譜云友之曾孫傳曰名未王命也杜註未受爵命為諸侯

其後數從齊桓以尊周室王命以為小邾子莊十五年宋齊邾伐郟僖七年小邾子來朝杜註曰黎

來始得王命而來朝也邾之別封故曰小邾此小邾始封之畧也自後屢與會盟皆稱小邾公羊謂

之小邾婁然亦時稱郟襄九年晉伐鄭杞人郟人從魏絳趙武斬行栗昭五年有郟申小邾穆公子

也昭十九年邾人郟人徐人會宋公同盟于蟲定元年宋仲幾曰滕薛郟吾役也與邾共稱則曰二

邾魯人謂二邾不忘我宜加敬是也春秋後六世滅于楚其地杜註東海昌慮縣北有郟城臣謹按

今滕縣東六里有郟城在南梁水東昌慮城見邦地濫再按公羊曰邦婁顏之時邦婁女有為魯夫人者孝公幼顏淫九公子于宮中因以納賊臧氏之母圍有賊以其子易公抱公以逃賊至湊公寢而弑之魯臣鮑廣交梁買子趨而至臧氏之母曰公不死也于是負孝公之周憇天子天子為之誅顏而立叔術反孝公于魯顏夫人曰有能為我殺殺顏者我為其妻叔術為之殺殺顏者而以為妻有子焉謂之盱夏父者其所為有子顏者也食必坐二子于側有珍怪之食盱必先取足焉夏父曰以來人未足而盱有餘叔術覺焉起而致國于夏父是說也世皆疑之夫顏既受誅于天子則殺顏者必天子之命吏也叔術安得而殺之叔術殺天子之命吏又妻媿行若狗丞則罪浮于顏天子何以不討國人何以反稱其賢夏父既宜為君則必世子之末命者宋忠曰小子肥別封郟則肥必

為世子之弟第已為國君而兄猶齟穽與盱共案而爭食有是理乎如曰肥庶出而夏父嫡也宋氏何以曰小子展轉舛舛用是知其妄也公羊又迷邾婁父兄公扈子之言曰惡有言人之國賢若此者乎誅顏之時天子死叔術起而致國于夏父斯為實錄矣蓋夏父實長子也坐父廢黜叔術迫于天子之命權受國而不辭迨乎天子易世之後乃授之夏父也陋巷志夏父為顏之長子友為顏之次子友子曰志亦小邾君而不見于經傳志弟莢則復聖之先祖也大賢之祖乃蒙此惡聲不可以辨不

句繹

哀二年及邾子盟于句繹哀十四年小邾射以句繹來奔或曰在鄒縣東南境

北燕

國於薊

史記召公奭與周同姓姓姬氏譙周曰周之

旁之諸侯雍梁荆豫徐揚之人咸被其德乃分岐
邦周召之地為周公旦召公奭之采邑施先公之
教于已所職之國其得賢人之化者謂之召南詩
甘棠篇蔽芾甘棠勿剪勿伐召伯所爰鄭氏箋曰
召伯聽男女之訟不重煩勞百姓止舍于甘棠之
下而聽斷馬國人思之故愛其樹也史記武王滅
紂封召公于北燕成王時召公為三公自陝以西
召公主之自陝以東周公主之詩譜曰召公封燕
死謚曰康公元子世之其次子亦世守采地在王
官春秋時召伯是也莊三十年遇于魯濟謀山戎
以其病燕故也燕之名始見于春秋杜註燕國今
薊縣國語齊桓公北伐山戎刺令支斬孤竹管子
桓公伐孤竹至卑耳之谿見人長尺而人物具馬
管子曰俞兒也史記山戎伐燕告急于齊齊桓公

救燕遂伐山戎至于孤竹而還燕莊公遂送桓公
入齊境桓公曰非天子諸侯相送不出境吾不可
以無禮于燕于是分溝割燕君所至之地與燕命
燕君復修召公之政納貢于周如成康時皆其事
也自是不復見至襄二十八年北燕伯朝晉是為
簡公款孔疏曰燕居漁陽薊縣其國僻小不通諸
夏自召公至簡公款二十六世始見于經二十九
年齊杖其大夫高止于北燕昭三年北燕伯款出
奔齊六年齊侯伐北燕將納簡公七年燕人暨齊
平歸燕姬賂以瑤鬻玉櫝竿耳不克而還十二年
齊高偃納北燕伯款于唐至獻公之世而春秋終
其地顛頊時為幽陵帝堯時為幽都帝舜時為幽
州昭九年詹桓伯曰肅慎燕亳吾北土也世本曰
召公居北燕史記曰武王封帝堯之後于薊張守
節正義曰召公始封蓋在北平無終縣以燕山為
名後漸強盛乃併薊徙居之薊之名則以地有薊

丘故樂毅報昭王書所謂薊丘之植植于汶篁是也燕世家王喜二十九年秦攻拔我薊王止徙居遼東知其常居薊矣秦置薊縣屬上谷郡項羽封臧荼為燕王都薊漢盧綰亦封焉後為廣陽國治更始二年光武北徇薊後為廣陽郡治魏曰燕郡晉為燕國皆治薊慕容儁嘗都此元和志曰薊城南北九里東西十里開十門慕容儁鑄銅為馬故其東南門曰銅馬門後魏仍為燕郡隋唐為幽州天寶間又嘗置范陽郡皆治此遼改縣曰薊北屬析津府尋又改為析津縣金貞元二年改曰大興縣後屬大興府元仍之明屬順天府今仍之京師東偏即其地也薊丘今在舊燕城西北隅古薊門地燕莊公送齊桓處在今滄州長蘆縣東北號曰燕留城再按寰宇記云燕召公封燕即今涿水縣後徙于薊故以武陽為下都蓋易為燕之下都信矣遂以為召公之故封則未可信水經注云燕

昭王廣延方士不欲令諸侯之客伺鄭燕邦故別
管下都館之南陲昭王創之于前子丹踵之于後
彫牆敗館尚傳鐫刻之名依此則下都管于昭王
矣又昭王所築黃金臺任昉引述異記曰在幽州
燕王故城中土人呼為賢士臺李善引上谷圖經
曰在易水東南十八里為說不同而傳述迷征賦
云出北薊歷良鄉登金臺觀武陽則武陽下都之
說洵非妄也又記曰易者燕桓侯之別都又曰燕
丈公遭易二君皆在春秋時是燕之有易猶夫晉
之曲沃齊之高唐以先君所常居而謂之下都理
也 尤明

阪泉

傳二十五年秦伯晉侯將納王卜之遇黃帝戰
于阪泉之兆杜註黃帝與神農之後戰于阪泉

之野勝之臣謹按漢涿鹿縣屬上谷郡應劭曰
黃帝戰蚩尤處文穎曰阪泉在上谷水經注涿鹿

城外一里有阪泉上有黃帝祠泉水東北流與蚩尤泉合水出蚩尤城城在涿鹿城東南六里水又

東北入涿括地志黃帝泉在懷戎縣東五十六里今在直隸保安州境

號

昭七年齊侯次于號燕入行成盟于濡上杜註號燕竟或曰在今河間府滄州境

濡上

見上杜註濡水出高陽縣東北至河間鄭縣入易水臣謹按孔疏曰高陽無此水也水源皆

出于山燕趙之間無泉出者未知杜言何據以臣愚測之則杜非無據孔少疎耳水經注濡水出蒲

陰縣西昌安國南枉渚迴湍率多曲復亦謂之曲逆水東與蒲水合又東北逕樂城南又東入博水

自下博水亦兼濡水通稱地志曰博水東至高陽入河然則濡水實至高陽矣又漢地志曰濡

水于曲逆城東南曲而西流入于祁水故名曲逆今祁水下流為方順河即曲逆水也土人以其名

不美而改之。又東為石橋河。又東為依城河。依城河即所謂高陽之河也。二說雖異其理則同。蓋古之濡水由博水以至於高陽。今博水已絕而濡水仍得至高陽。以有石橋河在也。漢高陽縣屬涿郡。後漢屬河間國。晉屬高陽國。宋淳化三年分高陽地置順安軍。反以高陽屬之。鄭樵通志謂之高陽順安軍是也。金為安州。元以後因之。依城河遠其城西至城北而合于南易水。土人謂之濡陽。蓋即以依城河為濡水也。南易水又東北合瓦濟河。即古中易水。一名拒馬河。又東經河間之境而入于海。古鄭縣在今河間府任丘縣。杜氏之言纖毫無爽也。近世張寅作安州志求濡陽之說而不得。乃以窮獨山之濡水當之。此濡水出易州。即北易水。竟合拒馬河以入于海。不由高陽而漫以之。相當蓋古義不明久矣。漢曲逆縣章帝改為蒲陰。今其故城在完縣東南二十里。是濡水之上源矣。孔氏

謂燕趙之境必無水源亦非質論也以此考之齊燕會于濡上蓋在今安州任丘間

陽

昭十二年齊高偃帥師納北燕伯于陽杜註陽即唐燕別邑中山有唐不言于燕未得國都臣謹

按左傳齊高偃納北燕伯欵于唐因其衆也杜註因唐衆故得先入唐孔疏經言于陽傳言于唐知

陽即唐也不言于燕未得國都與哀二年納蒯瞶于戚同此唐邑相傳唐堯初封于此後為鮮虞邑

趙滅鮮虞亦為唐邑漢置唐縣屬中山國後漢及晉因之後魏屬中山郡北齊省入安喜縣隋復置

屬定州唐因之五代屢改名劉漢復故宋金仍屬定州元屬保定路今改路為府縣北八里有唐山

一名堯山又縣東北十五里有都山張晏曰都山在望都縣南堯母慶都所居堯山在其北登堯山

望都山故以望都為名漢望都縣即今慶都縣西至唐縣三十里

ス
一
リ
ミ
ハ
ニ

暮
秋
地
名
攷
畧

三
十

春秋地名攷畧卷十二

欽定四庫全書

春秋地名攷畧卷十三

詹事府詹事高士奇撰

諸小國

宿

隱元年及宋人盟于宿杜註宿小國東平無鹽縣也臣謹按宿太昊後風姓男爵隱八年宿男卒

莊十一年宋人遷宿宿自此亡矣定十年侯犯將自郟奔齊駟赤先如宿杜註宿故國疑此時地已入齊矣高氏曰宿介于宋魯之間戰國時為齊之無鹽邑所謂無鹽醜女宿瘤者也史記宋義遣其子宋襄相齊身送之無鹽即此漢置無鹽縣為東平國治後漢因之劉昭曰故宿國也晉屬東平國

宋大明初魏敗東平太守劉胡于無鹽秦始皇三年魏將慕容白曜取無鹽後魏屬東平郡北齊省宋宣和中嘗置東平監于此今無鹽城在東平州東二十里再按公羊傳曰宋人遷宿不通也以地還之也何休曰還統也謂先繞取其地使不得通四方宿窮從宋求遷不通者不通所遷之地也穀梁曰宋人遷宿遷亡辭也其不地宿不復見也蓋經不言遷于某地宿已不知所往矣或言今宿遷縣志云宋人遷宿國之人于此因名歐陽志曰晉元帝督運軍儲于此以為郊閭因有宿預之名安帝遂立宿預縣實應初以代宗諱改為宿遷與宿國無與也

申

隱元年鄭武公娶於申曰武姜杜註申國今南陽宛縣臣謹按孔穎達曰外傳云申呂雖哀齊許猶在知四國同出伯夷姜姓也國語齊許申呂由太姜言由太姜而得封則申之始封亦在周初矣

其後申絕宣王之時申伯為王舅改封于謝崧高之篇乃其事也地理志南陽宛縣故申伯國宛縣者謂宣王改封之后也以前則不知其地再按詩云于邑于謝南國是武王命召伯定申伯之宅毛萇云謝周之南國也鄭桓公問于史伯曰謝西之九州何如對曰不可因也惟謝邾之間是易取也韋昭曰謝申伯之都今在南陽一千五百家為州謂謝西有九州也邾南謝北鄆國在焉潛夫論曰申在宛北序山之下路史曰序即謝也依此則申誠即謝無疑初封之申杜孔已不能知闕之可矣史記幽王以申侯女為后生太子宜臼既而嬖褒姒廢申后及太子而立褒姒子伯服申侯怒與繒西夷犬戎攻幽王殺幽王驪山下太子立為平王遂東遷焉莊六年為楚丈即位之二年楚與巴人伐申其事又見十八年傳蓋申國自此滅矣哀十七年子國曰彭仲爽申俘也文王以為令尹實縣

申息杜註文王滅申息以為縣即其事也後為封邑莊三十年申公鬬班殺子元僖十五年鬬克屈御寇以申息之師戍商密二十六年申公叔侯戍穀終春秋之世申息嘗為楚要地每有攻伐必發其兵僖二十八年城濮之役楚子入居于申大十八年羣蠻叛楚申息之北門不啟成六年楚以申息之師救蔡襄二十六年晉敗申息之師于桑隧獲申驪馬昭四年楚子會諸侯于申十一年楚子誘蔡侯殺之于申哀四年申公壽餘致蔡于負函致方城之外于緡闞是也括地志云故申城在南陽縣北三十里今南陽府治北二十里有申城

虢

東虢 隱元年鄭莊公曰制巖邑也虢叔死焉杜註虢國今滎陽縣 臣謹按漢志東虢在滎陽賈逵曰虢叔以封東虢制是也國語史伯謂鄭桓公曰濟洛河潁之間子男之國虢國為大章昭注東

號號仲之後姬姓也叔者其君之字也號叔死即鄭桓公寄帑事見鄭地首孔穎達曰號叔封西號仲封東而此云號叔東號君者言所滅之君字曰叔也桓十年號仲譖其大夫詹父于王杜註號仲即號公林父是叔之子孫字曰仲也西號後亦有叔莊二十一年鄭號納王鄭伯將王自圍門入號叔自北門入是也春秋燕國有二則一稱北燕邦國有二則一稱小邦此號國有二而經傳不言東西號者于時東號已滅故西號不復稱西也昭元年會于號即此漢志河南郡滎陽縣應劭云故號國有號亭杜氏通典洛之汜水為東號國餘詳鄭地制世紀云成臯為號號叔之封誤也詳見西

共

見衛地

夷

隱元年紀人伐夷杜註夷國在城陽壯武縣 臣謹按孔穎達曰世本妘姓傳無其人不知為誰所

滅壯武縣漢置屬膠東國文帝封宋昌為壯武侯後漢屬北海國劉昭曰古夷國也晉屬城陽郡張

華亦封壯武侯劉宋廢後魏亦封房法壽為壯武侯蓋縣去而名存也今壯武故城在即墨縣西

六十里 再按孔穎達曰莊十六年晉武公伐夷執夷詭諸杜註詭諸周大夫夷采地世族譜解夷

詭諸又云夷妘姓似混二夷為一當誤

戎

隱二年公會戎于潛杜註陳留濟陽縣東南有戎城 臣謹按是年及桓三年皆書公及戎盟于唐

莊十八年公追戎于濟西二十年齊人伐戎二十四年戎侵曹二十六年公伐戎皆此戎也濟陽漢

縣屬陳留郡昌邑王初徵至濟陽求長鳴雞即此光武生于濟陽官光明照室蓋縣有武帝東巡故

官也晉亦屬陳留國後魏廢今濟陽故城在蘭陽縣東五十里故戎城則在今曹縣境地相接也水經注濟瀆自濟陽縣故城南東逕戎城北即此再按胡氏盟唐傳按費氏稱淮夷徐戎蓋徐州之戎之居中國在魯之東郊者也

向

隱二年莒人入向杜註向小國也譙國龍亢縣東南有向城臣謹按世本向姜姓炎帝後本傳曰莒子娶于向向姜不安莒而歸莒人入向以姜氏還漢地理志沛郡有向縣故國春秋莒人入向即此後漢屬沛郡魏省入龍亢漢龍亢縣亦屬沛郡晉屬譙郡隋廢今其故城在鳳陽府懷遠縣西北八十五里古向城縣東北四十五里或疑向去莒遠春秋時遠國相為婚姻者多矣傳例入者造其國都以兵臨向迎姜氏還國耳水經注軹縣南山西曲有向城即向姜歸處此晉地誤

極

隱二年無駭帥師入極杜註極附庸小國臣謹按穀梁傳曰極國也不書氏者滅同姓貶也蓋極

為姬姓國矣無駭展氏不書展故曰不氏賈逵曰極戎邑也孔穎達曰時魯與戎好不應入其邑賈

誤也本傳曰司空無駭入極費彥父勝之杜註彥父費伯也前年城即今因得以勝極沈氏云因城

即而得勝極則極是境內故曰附庸今兗州府魚臺縣西有極亭

燕

南燕 隱五年衛人以燕師伐鄭杜註南燕國今東郡燕縣臣謹按孔穎達曰燕有二國一稱北

燕故此註稱南燕少別之世本燕國姑姓黃帝之後宣三年鄭丈公有賤妾曰燕姑杜註南燕姑姓

是也桓十二年公會宋公燕人盟于北邱十三年公會紀鄭及齊宋衛燕戰十八年王子克奔燕莊

元年衛師燕師伐周二十年鄭伯和王室不克執燕仲父襄二十一年齊叔孫還奔燕定十年齊成

何奔燕皆此燕國也孔氏曰小國無世家不知其
號謚惟燕仲父見傳戰國屬魏秦始皇五年蒙驁
攻魏拔燕秦為燕邑漢初盧綰劉賈擊破楚軍于
燕郭西又漢將程處反燕曹叅擊破之漢置南燕
縣屬東郡地理志曰南燕國也後漢初為樊鯨封
邑晉省謂之東燕城永嘉二年車騎將軍屯東燕
以拒石勒大興二年石勒將姚弋退保東燕是也
太和四年桓溫使毛虎生為東燕太守宋志曰東
燕郡江左分濮陽置胡氏曰祖逖置晉志曰石虎
時已有之矣後魏改為東燕縣仍屬東郡隋開皇
十八年改置胙城屬滑州唐宋因之金屬開封府
尋改屬衛州金時以河患四徙縣治貞祐中移衛
州治此元還治汲縣以縣屬焉今屬衛輝府古東
燕城在縣西水經注濮水逕胙城東又東北逕燕
城內故南燕國也縣東為陽清湖東西三十里南
北五里亦曰燕城湖再按吳氏曰韓奕之詩曰

韓侯娶妻汾王之甥蹶父之子蹶父孔武靡國不
到為韓媾相攸莫如韓樂又曰溥彼韓城燕師所
完鄭箋以燕為安謂平安時衆民之所築按南燕
媾姓也蹶父既靡國不到為其女韓媾視所居之
韓又率南燕之師以城之詩人歸其功曰燕師所
完也奈何以燕安訓之乎蹶父必南燕之君入為
鄉士者存

之備考

郟

隱五年衛師入郟杜註郟國也東平剛父縣西南
有郟鄉臣謹按郟公羊作盛孔疏曰管蔡世家
稱郟叔武丈王子武王之母弟後世無所見不知
其謚號十年齊人鄭人入郟莊八年師及齊師圍
郟郟降于齊師文十一年郟太子朱儒自安於夫
鍾國人勿狗杜註安處也狗順也十二年郟伯來
奔傳曰郟伯卒郟人立君太子以夫鍾及郟邾來
奔公以諸侯逆之孔氏曰因此知郟為伯爵說苑

孔子遊于邠之野即此杜註東平剛父縣晉志作剛平或預時嘗有此稱或傳寫之誤都未可定又考杜註魯闡縣但曰東平剛縣北則疑父字直衍丈耳戰國屬齊曰剛邑秦昭王三十六年取齊剛壽是也漢置剛縣屬泰山郡後漢屬濟北國晉曰剛平縣屬東平國後漢志濟北國又有成縣注曰本國劉昭曰即春秋所云衛師入邠也至晉已無之蓋省于晉前其地則入剛平故杜氏云然也水經注洸水上承汶水于罔縣西又西南經盛鄉城西京相璠曰罔縣西南有盛鄉城洸水又南至寧陽此罔縣即漢剛縣鄆元時晉剛平縣已省故但舉漢縣也因剛平訛為剛父後人又改為亢父張洽集傳曰邠國在單州任城縣蓋以亢父廢縣在其境故有此言不知晉亢父縣自屬任城國不屬東平國也豈得并其國號而改之乎今兗州府寧陽縣東北三十四里有埧城壩即漢剛縣故地而

邳在其西南蓋益近寧陽矣魯成邑在寧陽東北
九十里蓋亦以近邳而得名再考括地志漢濟

陰成陽縣為成伯之國乃今曹州
界近志汶上縣西北有邳城並誤

夫鍾

見上杜註夫鍾邳地臣謹按公羊作夫童桓
十一年公會宋公于夫鍾即此今汶上縣北有

里夫鍾

邳邳

見上杜註邳邑臣謹按吳氏曰鄭穆公妃曰
圭媯疑圭亦小國邳并之而加邑為邳左傳繫

之以邳曰邳邳所以別
于秦武公所伐之邳也

祭

周見

凡

周見

北戎

隱九年北戎侵鄭 臣謹按桓六年北戎伐齊 鄭太子救齊大敗戎師獲其二帥大良少良莊

三十年公及齊侯遇于魯濟謀伐山戎以其病燕 故也冬齊人伐山戎杜註山戎北狄三十一年齊

侯來獻戎捷僖十年齊侯許男伐北戎皆此戎也 國語曰北伐山戎刺今支斬孤竹而南歸海濱諸

侯莫不來服常昭曰山戎今之鮮卑二國山戎之與 也今支今為縣屬遼西孤竹之城存焉海濱海北

涯也今在 永平府境

郟

桓二年取郟大禹子宋 臣謹按僖二十年郟子 來朝杜註郟姬姓國孔疏曰二十四年傳富辰所

云聘季之弟丈王之子惟此年一見無時君謚號 不知誰滅之漢有郟成縣屬山陽郡後漢省入成

武縣屬濟陰郡范志云有郟城隱十年取郟是也 今兗州府城武縣東南二十里有郟城近志郟有

戴

二城北部城為部國又南二里曰南部城則宋邑也詳見宋地鄭夾滌亦云單州城武縣有兩部城

隱九年宋人蔡人衛人伐戴鄭伯伐取之杜註戴國今陳留外黃縣東南有戴城臣謹按戴公穀

作載漢改留縣屬梁國高帝封秘彭祖為戴侯國于此地理志曰本戴國莽曰嘉穀用秦名也後漢

曰考城屬陳留郡應劭曰章帝改名考城陳留志曰有穀亭晉省入外黃惠帝時復置屬濟陽郡宋

因之後魏將元暉業守考城梁將陳慶之攻拔之後改置考陽縣北齊省隋復置考城縣屬宋州唐

屬曹州宋屬開封府金屬曹州改屬睢州今仍之今城為正統間遷治故考城在縣東南五里漢外

黃縣屬陳留郡晉屬陳留國唐廢今其故城在杞縣東北六十里東與考城相近

息

隱十一年息侯伐鄭鄭伯與戰于境息師大敗而還杜註息國汝南新息縣臣謹按孔疏曰世本

息國姬姓此息侯伐鄭傳責其不親知與鄭國同
姓也莊十年傳曰蔡哀侯娶于陳息侯亦娶焉息
媯將歸過蔡蔡侯曰吾媯也止而見之勿宿息侯
聞之怒使謂楚丈王曰伐我吾求救于蔡而伐之
楚子從之敗蔡師于莘以蔡侯歸十四年蔡哀侯
以莘故繩息媯以語楚子楚子如息以食入享遂
滅息以息媯歸宣四年楚莊王曰吾先君丈王克
息獲三矢焉卽此時事矣息地自此入楚為封邑
僖二十五年屈禦寇為息公丈三年晉伐楚盟于
方城遇息公子朱十年陳侯鄭伯會楚于息定
四年左司馬戎將毀吳舟于淮汭及息而還餘詳
申國漢置新息縣屬汝南郡應劭曰古息國後東
徙故加新孔穎達非之曰若其後東徙當云故息
安得反加新乎斯言當矣然以臣愚測之應亦非
誤孔偶失于詳審耳夫應所謂東徙加新者原指
息國之舊非謂漢縣有移徙也蓋息國故在西後

徙而東因謂之新息猶夫鄭徙溱洧謂之新鄭也
鄭莊公曰我先君新邑于此杜預曰今居河南乃
新鄭舊鄭在京兆即其說已鄭與息國號也新鄭
新息鄉俗之常稱也後人置縣但從其鄉俗之稱
是故置縣于鄭但謂之新鄭而不曰鄭置縣於息
但謂之新息而不曰息也如曰漢初置名息縣既
遷而加新則晉時新息已非息國之舊杜預何以
云息國即新息乎此可以一言而解紛矣後漢仍
曰新息縣封馬援為侯邑晉為汝南郡治劉宋改
為南新息縣復于城北三十里置北新息縣北齊
省北入南仍名新息縣自魏迄周皆立僑州屢改
名號最後曰息州隋與郡罷縣屬蔡州唐初復置
息州尋罷縣屬豫州宋仍屬蔡州金又置息州元
省附郭新息縣入之明改州為縣屬汝寧府今仍
之

芮

桓三年芮伯萬之母芮姜惡芮伯之多寵人也故
 逐之出居于魏杜註在馮翊臨晉縣臣謹按芮
 姬姓伯爵詩曰虞芮質厥成毛萇曰虞芮之君相
 與爭田久而不平乃相謂曰西伯仁人也盍往質
 焉入其朝感而相讓以所爭田為閒田而退即此
 芮也虞國則未詳所在詹桓伯曰魏駘芮岐畢吾
 西土蓋久在西周邦域中矣後入為王朝卿士次
 于冢宰奭之後繼以彤伯畢公衛侯毛公孔傳曰
 司徒第二芮伯為之孔疏曰彤如姓之國餘五國
 皆姬姓也厲王說榮夷公芮良夫諫常昭曰芮伯
 也此皆芮國先世可考者桓四年秦師侵芮敗焉
 小之也王師秦師圍魏執芮伯以歸杜註三年芮
 伯出居魏芮更立君秦以芮伯歸將欲納之九年
 芮伯與虢仲伐晉十年秦伯納芮伯萬子芮自後
 不復見經孔疏曰不知誰滅之竹書紀年秦穆公
 二年滅芮臨晉漢縣屬馮翊郡地理志曰有芮鄉

古芮國也後漢因之晉以為馮翊郡治尋廢今其故城在同州朝邑縣西南二里縣道記臨晉本芮鄉地因秦築壘以臨晉地故曰臨晉括地志南芮鄉在朝邑縣南三十里又有北芮鄉皆古芮國今同州之境所謂廢華陰城者是也本漢臨晉縣地北魏置華陰縣隋改馮翊縣為同州治所唐宋因之元省馮翊縣入州今其城在同州城南蓋州治移而故城為廢墟矣再按魏收志河北縣有芮城隋置芮城縣今屬解州本魏國地蓋芮伯萬奔魏時所居

魏

見上杜註魏國河東北縣臣謹按魏國姬姓襄二十九年女叔侯曰虞虢焦滑霍楊韓魏皆姬姓也而晉滅之孔疏曰周以封同姓不知始封之君其封域詩譜曰虞舜夏禹所都之地在禹貢冀州雷首之北析城之東南枕河曲北涉汾水晉舜明歷山陶于河濱禹菲飲食惡衣服卑宮室一帝

一王儉約之化于時猶存鄭氏曰周平桓之世魏君儉嗇而禍急不務修德國人作葛屨之詩以刺之季札聞魏風曰美哉大而婉儉而易行以德輔此則明主也杜註傷其國小而無明君閔元年晉滅魏以賜畢萬卜偃曰畢萬之後必大魏大名也文十三年使魏壽餘偽以魏叛以誘士會秦伯師于河西魏人在東士會濟河魏人謀而還可以知魏地之隣于秦矣漢置河北縣屬河東郡地理志曰詩魏國也晉因之後魏屬河北郡隋置芮城縣括地志魏故國在芮城縣北五里今屬解州

隨

桓六年楚武王侵隨杜註今義陽隨縣臣謹按孔疏世本隨國姬姓不知始封為誰桓八年楚子合諸侯于沈鹿黃隨不會楚子伐隨戰于速杞隨侯逸冬隨及楚平時鬪伯比曰漢東之國隨為大莊四年楚營軍臨隨隨人懼行成僖二十年經書楚子伐隨傳曰隨以漢東諸侯叛楚鬪穀於菟帥

師伐隨取成而還孔疏曰隨自此為楚私屬不與諸侯會同矣昭十七年楚敗吳師獲其乘舟使隨人守之定四年吳入郢楚昭王踰雒涉漳入于雲中已復奔隨吳人從之謂隨人曰周之子孫在漢川者楚實盡之周室何罪君若顧報周室施及寡人君之惠也子期似王逃王而已為王隨人卜與之不吉卒辭吳人依此知隨為姬姓矣孔疏曰隨在楚之東吳人尚在楚更東來謂與隨有恩可保守故也定五年昭王反國哀元年楚子陳侯隨侯許男圍蔡杜註隨世服于楚不通中國昭王奔隨隨人免之楚以此德隨列于諸侯故得見經孔疏曰其後不知為誰所滅秦置隨縣屬南陽郡漢因之晉屬義陽郡太康中分置隨國劉宋改郡縣名皆曰隨陽尋去陽字西魏置并州尋改隨州隋廢郡州如故歷唐宋至元時復置郡尋罷大率皆為隨州元屬德安府明省附郭隨縣入州今仍之宋

紹興以後州城屢徙至元中始
定于今治城邑攷古城在州南

速杞

見上

黃

桓八年楚子合諸侯于沈鹿黃隨不會楚子使蘧
章讓黃杜註黃國嬴姓今弋陽縣臣謹按史記

黃帝末孫陸終之後封于黃莊十九年楚子伐黃
敗黃師于蹠陵僖二年盟于貫左傳服江黃也公
羊曰遠國也三年會于陽穀四年伐陳黃皆與焉
胡氏曰齊桓公遠結江黃以制楚也五年楚人滅
弦弦子奔黃十一年楚人伐黃十二年滅黃傳曰
黃人恃諸侯之睦于齊也不共楚職曰自郢及我
九百里焉能害我楚滅黃弋陽漢縣屬汝南郡晉
因之後魏常置弋陽郡于此高齊改為定遠縣弋
陽之名遂隱今其故城在光
州東又州西十二里有黃城

踏陵

見上杜註踏陵黃地在光州西南境

鄧

桓七年鄧侯吾離來朝釋例曰鄧國今義陽鄧縣見桓二年會鄧疏臣謹按鄧曼姓侯爵桓十三

年楚屈瑕伐羅請濟師楚子辭焉入告夫人鄧曼杜註鄧曼楚武王夫人莊二年楚武王荆尸入告

夫人鄧曼曰余心蕩鄧曼曰王嚮于行國之福也王卒子丈王立六年楚丈王伐申過鄧鄧侯曰吾

甥也止而享之驪甥媵甥養甥請殺楚子弗從還年楚子伐鄧十六年楚復伐鄧滅之地入于楚成

九年鄭伯會楚公子成于鄧是也秦昭襄王元年大良造白起攻楚取鄧置鄧縣屬南陽漢因之應

劭曰鄧侯國也更始二年封王常為鄧王建武三年岑彭破秦豐兵於鄧圍黎丘晉志有鄧縣屬義

陽郡註曰古鄧侯國又有鄧城縣屬襄陽郡蓋分置也晉末僑置京兆郡宋為實土鄧縣屬焉其後

但有鄧城而郡縣不復見蓋已併入郡城矣齊永泰間魏王宏攻圍鄧城齊將曹虎固守不下梁承聖三年西魏將于謹至樊鄧梁王營率衆會之後周鄧城縣廢魏于其地置安養縣唐改置臨漢縣已仍為鄧城縣屬襄州宋因之元省今為鄧城鎮在襄陽府城東北二十里陸機辨亡論魏氏浮鄧塞之舟下漢陰之衆謂此水經注鄧塞者鄧城東南小山消水經其東王氏通釋謂此即古鄧國習鑿齒襄陽記楚王城鄧之濁水去襄陽二十里

穀

桓七年穀伯綏來朝杜註穀國在南鄉穀城縣北臣謹按今穀城縣西十里有穀城山上有石城水經注曰古穀國在穀城山上是也又縣西北七里古穀城志謂穀國在此晉于此置義成縣梁時亦謂之穀城中大通五年雍州刺史盧陵王續遣柳仲禮屯穀城以拒魏是也漢筑陽縣屬南陽

郡魏屬南郡晉屬順陽郡隋改
縣曰穀城屬襄州今屬襄陽府

鄧

桓九年楚子使道朔將巴客以聘于鄧鄧南鄙鄧
人攻而奪之幣殺道朔及巴行人楚使鬬廉及巴
師圍鄧鄧師救之大敗鄧人宵潰杜註鄧在今鄧
縣南沔水之北臣謹按哀十八年巴人伐楚圍
鄧楚敗巴師于鄧蓋鄧為楚邑久矣後漢志鄧縣
有鄧聚光武曰宛最强鄧次之是也晉置鄧縣屬
襄陽郡後廢寰宇記鄧城在郡城八里今襄
陽府城東北十二里有鄧城為古鄧子國

梁

桓九年虢仲芮伯梁伯荀侯賈伯伐曲沃杜註梁
國在馮翊夏陽縣臣謹按孔疏梁嬴姓僖六年
晉惠公將奔狄卻芮曰不如之梁梁近秦而幸乃
之梁十七年傳惠公之在梁也梁伯妻之梁嬴十
八年梁伯益其國而不能實也命曰新里秦取之
十九年梁亡傳曰梁伯好土功亟成而弗處民疲

而弗堪秦遂取梁昭十三年沈尹戌曰梁伯溝其
公宮而民潰即此事也秦得梁地以為邑曰少梁
文十年晉人取少梁杜註與桓九年同後屬魏魏
世家文侯六年城少梁梁惠王九年與秦戰少梁
虜我將公孫痤秦紀秦取魏少梁是也惠文王十
年更名曰夏陽縣漢因之屬左馮翊後漢初鄧禹
平河東自汾陽渡河入夏陽晉亦屬馮翊郡魏屬
華山郡隋改為韓城縣屬同州歷唐宋大率因之
金升棗州元復故今仍之古少梁城在縣南二十
里 號別見芮見前 後漢志以河南梁縣為梁
國水經注以浚儀
大梁為梁國皆誤

新里

見上杜註梁地
秦新城詳見秦地

即

荀

見上杜註國名 臣謹按世本荀賈皆姬姓不知
誰滅之晉大夫有荀氏賈氏蓋晉滅之以賜大夫

臣瓚曰荀國在河東水經注古水出臨汾縣西又西南流逕荀城東古荀國也都邑志荀城在絳州正平縣西十五里正平隋縣今絳州東北二十五里有臨汾故城是也然則荀國當在絳州界矣再按先儒皆謂荀即郇考詩云郇伯勞之竹書昭王六年賜郇伯命則郇為伯爵自不同也逸周書王會解云天子南面立唐叔荀叔周公在左孔晁皆云唐荀皆成王弟是郇為文昭荀為武穆又不同也孔疏又止云荀姬姓其為兩國無疑郇見晉地

賈

見上杜註賈國名 臣謹按莊二十八年晉獻公娶于賈無子杜註賈姬姓國昭二十八年昔賈大夫惡娶妻而美三年不言不笑杜註賈國之大夫即此也博物記臨汾有賈鄉古賈伯邑今在絳州界又今華州蒲城縣西南十八里有賈城二說未知孰是

貳

桓十一年楚屈瑕將盟貳軫鄢人軍于蒲騷將與隨絞州蓼伐楚師杜註貳國名近志在今隨州

應山

縣境

軫

見上杜註軫國名近志在今德安府應城縣西

鄢

見上杜註鄢國在江夏雲杜縣東南有鄢城臣謹按宣四年傳云若敖娶于邲生鬬伯比若敖卒

從其母畜於邲淫於邲子田見之遂使收之楚人謂

棄諸夢中虎乳之邲子田見之遂使收之楚人謂

乳穀謂虎於菟故命之曰鬬穀於菟以其女妻伯

比杜註邲國名蓋即此鄢也其後滅于楚有其地

昭十四年楚子殺鬬成然使鬬卒居鄢以無忘舊

勳定四年吳入鄢昭王自雲中奔鄢鄢公辛之弟

懷將弑王辛止之與其弟巢以王奔隨是也其地

漢志江夏竟陵縣有鄢鄉楚鄢公邑應劭曰江夏

雲杜縣有邳亭即若教娶處二說皆與杜同漢雲杜縣後周廢今其故城在景陵縣西北景陵即漢竟陵也然求其境內則無地以擬之水經注曰涓水逕安陸故城古鄆城也漢安陸縣屬江夏郡晉為江夏郡治周置涓州唐為安州宋為安德府明為德安府又歷代所改州郡之名甚多皆以安陸為治所至今仍之元和志云安州即邳子國杜氏通典曰安州即邳楚滅之以封鬬辛邳鄆涓三字通用又其地故名鄆城五代志云安陸縣理鄆城晉太元八年苻堅大舉入寇慕容垂進拔鄆城義熙初桓振據江陵為劉毅等所敗逃于涓川既又自鄆城襲江陵梁武帝攻魯山謂鄆城竟陵之粟方舟而下是也豈安陸實鄆國故父老傳其名因得見于史與然終與杜不合未知何故也臣愚以為鄆境本廣而安陸雲杜竟陵皆接壤王莽地皇三年賊帥王匡拔竟陵轉擊雲杜安陸可徵已涓

水遠安陸固宜為鄖都雲杜以夢為名或即鄖子
田處亦未可知耳 再按劉昭誤引杜註入軹縣
下

蒲騷

見上杜註蒲騷鄭也 臣謹按今德安府應城
縣北三十里有蒲騷魏嘗于此置浮陽縣隋廢

絞

見上杜註絞國名 臣謹按桓十二年楚伐絞大
敗之為城下之盟而還即此或曰在今鄖陽府西
北

州

見上杜註州國在南郡華容縣東南 臣謹按哀
十七年太師子穀曰觀丁父郟俘也 武王以為軍

率是以克州蓼服隨唐大啟羣蠻蓋二國不久皆
滅矣戰國策莊辛謂頃襄王左州侯右夏侯蓋嘗
以為嬖人邑也 史記楚考烈王元年納州于秦以
平漢為州陵縣屬南郡後漢因之 吳廢晉太康初

復置州陵縣仍屬南郡宋改屬巴陵郡齊梁因之後周廢今州陵城在監利縣東三十里

蓼

見上杜註蓼國今義陽縣東南湖陽城臣謹按郎古颺國昭二十九年蔡墨曰昔颺叔安裔于董

父事舜氏曰豢龍封諸醴川醴夷氏其後也杜註醴水上夷皆董姓鄭語董姓醴夷則夏滅之矣商

書遂伐三醴俘厥寶玉蓋即所謂水上醴夷之餘種也孔傳三醴國名今定陶也見曹國颺則叔安

之初封繼處其地者則為蓼亦曰廖楚得其地謂之湖陽竹書楚共王會宋平公于湖陽史記沛公

攻湖陽下之漢為縣屬南陽郡地理志曰故廖國師古曰廖力救反左傳作颺其音同耳後漢初光

武封妣為湖陽公主建安二年曹操擊張繡于穰拔湖陽又攻舞陰下之晉省入棘陽宋齊于此置

戍北魏太和二十二年克之復置湖陽縣梁嘗得之尋復入魏北朝皆于此設僑州郡代有變改唐

貞觀中始罷以縣屬唐州宋仍之金廢縣為鎮嘉定十三年孟宗政敗金人于湖陽即此鎮也今湖

陽故城在南陽府

唐縣南九十里

羅

桓十二年楚伐絞涉於彭羅人欲伐之杜註羅熊姓國在宜城縣西山中後徙南郡枝江縣臣謹

按孔疏曰羅熊姓國世本文也桓十三年屈瑕伐羅羅與盧戎兩軍之大敗之自後不復見蓋遷于

楚矣九域志羅國城在襄陽今襄陽府宜城縣西二十里有羅川城楚連之枝江國語富辰曰羅之

亡因季姬當在此時後漢志枝江侯國本羅國後又徙於長沙今岳州府平江縣南三十里有羅城

即羅子國又長沙府湘陰縣東六十里有羅城乃接境處也秦置縣漢晉因之皆屬長沙郡唐廢亦

謂之羅川隋末蕭銑為羅川令即此也地有汨羅江源出江西之寧州分為二一日汨水一經古羅

城曰羅水至屈潭而復
合即屈原自沉處也

賴

桓十三年楚屈瑕伐羅楚子使賴人追之不及杜
註賴國在義陽隨縣賴人仕於楚者臣謹按賴

公穀作厲昭四年會于申執齊慶封殺之遂滅賴
賴子面縛銜璧造于中軍王釋其縛受其璧遷賴

于郟城之而還申無宇曰求諸侯而至伐國而克
城竟莫校王心不違民其居乎杜註謂慕城于外

竟諸侯無與爭是年冬傳云東國水不可以城彭
生罷賴之師杜註謂罷城賴之師林氏曰東國賴

故都也然則賴地蓋在方城之外昭十四年楚平
王簡東國之師于召陵即此東國矣乃又云賴在

隨縣不知何故後漢志襄信侯國有賴亭故賴國
文獻通考云賴國在襄信縣漢襄信縣劉宋改芑

信元省為芑信鎮今在息縣東北其賴亭則在光
州商城縣南蓋地相接也商城縣隋曰殷城故志

又云殷城有賴亭在當時正為楚國方城外地與傳義甚相合也

盧戎

見楚地盧

牟

桓十四年邾人牟人葛人來朝杜註牟國今泰山牟縣臣謹按僖五年公孫茲如牟娶焉即此漢

置牟縣屬泰山郡地理志曰故國也後漢以下皆因之北齊省今泰安州萊蕪縣東二十里有牟城

葛

見上杜註梁國寧陵縣東北臣謹按葛蓋古國孟子湯居亳與葛為鄰僖十七年齊桓公如夫人

者六人曰葛嬴寧陵漢縣屬陳留郡應劭曰故葛伯國後漢屬梁國晉因之今屬歸德府縣北十五

里有葛城張洽傳葛國在拱州寧陵縣水經注葛城在寧陵縣東四十里

於餘丘

莊二年公子度伐於餘丘杜註於餘丘國名也臣謹按公羊傳曰於餘丘者何邦婁

之邑也穀梁亦曰邾邑高氏曰於發語辭猶曰於
越程沙隨曰邾附庸汪氏曰小國而後屬邾啖氏
曰前後未有邑言伐者蓋杜
說為長也或曰在沂州界

譚

莊九年齊師滅譚譚子奔莒杜註譚國在濟南東
平陵縣臣謹按詩碩人篇閔莊姜也曰譚公惟
私毛萇曰姊妹之夫曰私蓋亦齊之婚姻國也漢
置東平陵縣以右扶風有平陵故加東濟南郡治
焉晉初移郡治歷城縣尋廢趙石虎建武八年濟
南平陵城北石虎一夜中自移于城東虎以為已
瑞也後魏亦置平陵縣仍屬濟南郡唐初復置并
置譚州治焉貞觀初州廢縣屬齊州十七年齊州
都督齊王祐據州叛土人李君求等據縣不從因
改曰全節元和十年省入歷城今濟南府治東七
十五里有東平陵故城又有譚城在府東南七十
里史記齊世家桓公二年滅邾此誤以譚為邾

又周本紀襄王十六年翟
人殺譚伯此誤以原為譚

遂

見陳

蕭

見宋地

滑

莊十六年滑伯同盟于幽杜註滑國都費河南緱
氏縣臣謹按滑國姬姓僖三十三年秦人入滑
左傳曰孟明滅滑而還杜註滅而書入不能有其
地也成十三年晉使呂相絕秦曰殄滅我費滑離
散我兄弟杜註費滑滑國與晉同姓孔疏春秋之
時更無費國秦惟滅滑知滑即費國邑並舉也十
七年鄭子駟侵晉虛滑杜註虛滑晉二邑滑故滑
國為秦所滅時屬晉後屬周襄十八年楚公子格
帥師侵費滑胥靡杜注胥靡鄭邑孔疏曰不言費
滑杜意當以費滑為周邑也二十九年女叔齊曰

滑姬姓也。晉是以大若非侵小將何所取當即指
虛滑為二邑。時馬氏曰秦晉所滅各是一國。蓋誤
定六年鄭伐周馮滑胥靡孔疏曰滑此時又屬周
矣。周人又謂之侯氏。昭二十二年王子朝之亂晉
師軍于侯氏。戰國為維氏。史記秦昭王四十六年
梁攻韓。緱氏蘭拔之。漢置緱氏縣。屬河南郡。晉因
之水。經注休水重源。又發緱氏原。王子晉控鶴于
此。又逕延壽城南。緱氏縣治。故費滑也。太安二年
成都王穎自鄴入。犯帝幸緱氏。擊穎將牽秀走之。
下至唐宋皆屬河南郡。惟東魏一屬洛陽。熙寧初
省入偃師。今其故城在縣南二十里。
再按僖二十年鄭入滑。應別為一國也。

權

莊十八年楚武王克權。杜註。權國名。南都當陽縣
東南有權城。臣謹按水經注。沔水逕當陽縣之
章山東。又東會權口。南流逕權城。此古之權國也。
權水發源于荆門州之西蒙諸山。至當陽而合。今

當陽縣東
南有權城

郭

莊二十四年經書郭公 臣謹按胡氏曰郭亡也
管子曰齊桓公游于郊見亡國之墟焉訪諸野耆
故郭國之墟也惟善善不能用惡惡不能去是以
亡也今東昌府聊城縣有郭水水之南岍有郭城

博城圖經曰春秋亡國郭氏之墟也 再按

劉向新序郭為北燕之地與齊接壤無據

戎

莊二十八年晉獻公娶二女子戎大戎子狐姬生
重耳杜註大戎唐叔子孫別在戎狄者 臣謹按

孔疏曰晉語狐氏出自唐叔之後狐伯行之子
實生重耳或曰狐偃其舅也在今延安府境

小戎

小戎子生夷吾杜註小戎允姓之戎 臣謹按
孔疏此即瓜州之允姓戎也子爵後遷于中國

為陸渾之戎又曰陰戎又曰九州戎此時不知其
所居昭九年晉梁丙張趯率陰戎伐潁王使詹桓

伯辭於晉曰允姓之姦居于瓜州伯父惠公歸自秦而誘以來杜註陰戎陸渾之戎也允姓陰戎之祖與三苗俱放三危者瓜州今燉煌此戎始居瓜州之說也禹貢三危既宅傳云三危在鳥鼠之西水經曰河入塞過燉煌酒泉張掖郡又東逕允川漢書地理志金城郡有允吾允街二縣應劭曰允吾湟水入河所必逕後漢書西羌傳燒當之孫滇良居大允谷此皆因允姓戎而得名瓜州土肥饒產美瓜長者狐入其中食之首尾不見漢武帝後元年取瓜州故地為涼州唐亦置瓜州今陝西肅州衛西五百二十六里有瓜州城蓋距中國遠矣晉獻公與為婚姻必不踰越荒徼是知戎之部族早有內徙者特不能明其處耳後漢志云允姓戎居渭汭容或有之僖二十二年傳秦晉徙陸渾之戎于伊川杜註允姓之戎居陸渾在秦晉西北二國誘而徙之伊川遂徙戎號至今為陸渾縣孔疏

此即唐桓伯所謂惠公歸自秦而誘以來也彼註瓜州在燉煌知陸渾為燉煌地名徙之伊川仍以陸渾為名後世縣名猶然蓋戎為惠公母家故徙于此時也宣三年楚子伐陸渾之戎成六年晉鄭衛及伊雒之戎陸渾蠻氏俱侵宋昭十七年晉荀吳滅陸渾之戎以其貳于楚也陸渾子奔楚其餘服屬於晉謂之九州戎昭二十二年晉籍談荀躒帥九州之戎以納王于王城杜註九州戎陸渾戎也滅而屬晉州鄉屬五州為鄉哀四年楚圍蠻氏蠻子赤奔晉陰地楚使謂陰地之命大夫士蔑士蔑乃致九州之戎執蠻子以畀楚楚註陰地河南山北自上雒以至陸渾蓋秦晉間之隙地也詳見晉地中陸渾之戎所以兼號陰戎者為此也漢置陸渾縣屬弘農郡晉屬河南郡東魏分置南陸渾縣而以縣為北陸渾後周省北入南唐析置伊陽縣屬洛州宋省陸渾入伊陽屬河南府尋升順州

金改嵩州治伊陽縣元省縣入州屬南陽路明改州為嵩縣屬河南府今仍之古陸渾城在今縣北三十里再按僖三十三年晉人及姜戎敗秦師於穀杜註姜姓之戎居晉之南鄙襄十四年晉執戎子駒支范宣子數諸朝曰來姜戎氏昔秦人迫逐乃祖吾離于瓜州乃祖吾離被苦蓋蒙荆棘以來歸我先君我先君惠公有不腆之田與汝分而食之對曰昔秦人負恃其衆貪于土地逐我諸戎惠公蠲其大德謂我諸戎是四岳之裔胄也無自翦棄賜我南鄙之田以為先君不侵不叛之臣杜註四岳之後皆姓姜又別為允姓孔疏曰周語稱堯遭洪水使禹治之共之從孫四岳佐之胙四岳國命為侯伯賈逵曰共共工也姜炎帝之姓其後變易帝復賜四岳以祖姓也昭九年傳同說此事而曰允姓知姜姓之後又別為允姓也又云僖二十二年傳言秦晉共遷陸渾昭九年傳惠公獨誘

之此云秦人逐之惠公與田三文不同者此戎本處瓜州遠在秦之西北秦貪其土晉貪其人二國共誘而使遷僖傳是其實也昭傳王專責晉故指言晉宣子市恩于戎故言秦逐駒支順宣子之意遂曰秦貪土地耳依此則姜戎亦陸渾之別部同因晉惠之母族而遷明甚矣再按僖十一年楊拒泉臯伊雒之戎共伐王城釋例曰諸雜戎居伊水雒水之間者河南雒陽縣西南有戎城文八年公子遂及雒戎盟于暴即此也孔疏此陸渾未遷以前戎之先居伊雒者再按成元年王師敗績于茅戎傳曰敗績于徐吾氏杜註茅戎別種也徐吾氏茅戎之別種也蓋亦伊雒之別部矣水經注大陽縣有茅亭故茅戎邑也括地志茅城在河北縣西二十里今之平陸縣界此晉邑也見晉地中蓋戎人亦附晉邑以居

驪戎

莊二十八年晉獻公伐驪戎戎男女以驪姬杜註驪戎在京兆新豐縣姬姓其爵男也臣謹

按史記始皇二十五年秦置驪邑三十五年徙三萬家于麗邑即驪戎故城也漢置新豐縣屬京兆郡後漢志新豐古驪戎國唐析置昭應縣省新豐入之宋改臨潼縣今仍之縣東二十四里有驪戎城驪山蓋以戎國而得名史記周紀犬戎殺幽王驪山下始皇二十七年作甬道自咸陽至驪山又始皇營葬于驪山役徒七十萬人唐先天二年幸新豐講武于驪山下山左右峻嶺如雲霞繡錯故有繡嶺之名天寶改曰會昌山又改昭應山

鄆

莊三十年齊人降鄆杜註鄆紀附庸國東平無鹽縣東北有鄆城臣謹按公穀及劉氏賈氏皆言鄆為紀之邊邑孔疏曰紀侯去國至此二十七年紀侯猶不堪齊而去邑安得獨存蓋附庸小國若

郭郭者也水經注汶水過平章縣南平章世本任
姓之國即齊人所降郭也今郭城在東平州東六
十里有郭城集無鹽見宿國水
經註郭城在無鹽東五十里

耿

閔元年晉滅耿滅霍滅魏賜趙夙耿杜註三國皆
姬姓平陽皮氏縣東南有耿鄉臣謹按水經註
汾水西逕耿鄉城北書序曰祖乙地于耿盤庚以
耿在河北迫近山川乃自耿遷于亳史記祖乙遷
邢司馬貞曰邢音耿即耿也秦置皮氏縣惠丈君
九年渡河取汾陰皮氏是也漢因之屬河東郡河
東大守番係請穿渠引汾水以溉皮氏地理志有
耿鄉古耿國也晉屬平陽郡後魏改為龍門縣蓋
因山以名唐因之隋屬蒲州唐屬絳州括地志故
耿城今名耿倉城在龍門縣東南十二里宋屬河
中府宣和中改為河津縣今仍之
屬平陽府古耿城在縣南十二里

霍

見上杜註永安縣東北有霍太山臣謹按史記霍叔處武王第八子封于霍書序曰周公位冢宰

正百工羣叔流言降霍叔于庶人三年不齒孔傳罪輕故退為庶人三年之後乃齒錄封為霍侯穆

王十六年天子東游宿于防霍侯舊告薨至霍哀公為晉所滅哀公奔齊晉以其地賜大夫先且居

文五年傳書霍伯卒是也後以大旱卜之曰霍太

山為崇復召霍君以奉祀尋復滅之魏世家慎子徙居霍即此漢置瓠縣東漢改為永安屬河東郡

晉屬平陽郡隋改為霍邑縣自魏至唐屢置州郡不久旋廢更以縣他屬金置霍州元因之明以州

治霍邑縣省入今因之古霍城在州西十六里

陽閔二年齊人遷陽杜註陽國名臣謹按淮南子曰陽國御姓侯爵漢陽都縣屬城陽國應劭曰故陽國也後漢屬瑯琊國水經注沂水又東逕陽都故城縣蓋于晉末廢章懷太子曰陽都在沂水縣

南今莒州沂水
縣南有陽都城

犬戎

閱二年虢公敗犬戎于渭汭杜註犬戎
西戎別在中國者在今鳳翔府境

東山臯落氏

閔二年晉侯使太子申生伐東山臯落
氏杜註赤狄別種也臯落其氏族臣

謹按此赤狄見經之始也孔疏曰狄有赤狄白狄
成十二年晉侯使呂相絕秦曰白狄及君同鄉則
白狄與秦相近當在晉西此云東山當在晉東又
云赤白之義未聞當是其族以赤衣白衣為識也
定三年赤狄侵齊四年赤狄侵齊六年赤狄伐晉
七年赤狄侵晉十一年晉侯會狄于攢函杜註攢
函狄地晉侯往會之傳曰晉卻成子求成于衆狄
衆狄疾赤狄之役遂服于晉杜註赤狄潞氏最强
故復役衆狄十三年赤狄伐晉及清先穀召之也
十四年晉師滅赤狄潞氏以潞子嬰兒歸杜註潞

赤狄之別種潞氏國故稱氏子爵也傳曰晉荀林父敗赤狄于曲梁滅潞曲梁在今廣平府見晉地蓋師反出其東而轉攻之所以絕其奔逸也十六年晉士會帥師滅赤狄甲氏及留吁鐸辰獻狄俘于王王以黻冕命士會將中軍且為太傅杜註甲氏留吁鐸辰赤狄別種晉既滅潞氏又并盡其餘黨成三年晉卻克衛孫良夫伐唐咎如討赤狄之餘焉杜註潞氏餘民散入唐咎如故討之劉炫曰唐咎如之國即是赤狄之餘是也唐咎如先見于僖二十三年曰狄人伐唐咎如獲其二女叔隗季隗納諸公子公子取季隗生伯儵叔劉以叔隗妻趙衰生盾杜註唐咎如赤狄之別種也隗姓然則咎如為赤狄杜巳先言孔氏片劉之非誤矣孔氏又曰潞臯落等為國名其加氏者赤狄既須稱狄單國便不成文故以氏配之是也臣愚以為諸國之中潞為最大傳言潞子嬰兒夫人晉景公之姊

也則通婚妯于大國矣其爵為子則受爵命矣有
鄴舒為國相則置官司矣地據晉國之腹心故經
營之甚力滅潞之歲秦桓公伐晉侯別遣魏顆
以偏師禦敵而身留治兵于稷畧定狄土後使呂
相責秦則曰利我有狄難入我河縣焚我箕部是
也蓋晉人立國規模于斯而定所闕至重矣臯落
當亦大國晉獻公命太子伐之二軍俱行里克復
虞其將戰則誠勅敵也其餘侵擾隣境但以號舉
者則所謂服屬于潞氏者矣潞國之地孔疏述釋
例曰今上黨潞縣潞縣漢置屬上黨郡地理志曰
古潞子國晉為上黨郡治魏改為刈陵縣隋廢尋
改置潞城縣屬潞州唐因之天祐二年改曰潞子
縣五代唐復曰潞城今仍之屬潞安府古潞城在
縣東北四十里漢縣蓋治此後魏移治漳水東則
今治也臯落氏地服虔曰臯落赤狄之都也水經
注清水出清廉山東經臯落城北世謂之倚毫城

又東南經陽壺城入河則垣縣界矣通典垣縣有
臯落城金志垣曲縣有臯落鎮今在平陽府垣曲
縣西北六十里又太原府樂平縣有臯落山未知
孰是甲氏地在今廣平雞澤縣地留吁在廣平鐸
辰在潞安府境諸赤狄
亦當在潞安府境也

江

僖二年及江人盟于貫杜註江國在汝南安陽縣
臣謹按江嬴姓四年及江人伐陳文三年楚人
圍江晉陽處父帥師伐楚以救江四年楚人滅江
漢安陽縣屬汝南郡應劭曰安陽有江亭故江國
晉曰南安陽以河北有安陽也劉宋復為安陽自
後漢至魏皆屬汝南郡隋省入真陽括地志安陽
故城在新息縣西南八十里今故安陽城及江城
皆在汝寧府真陽縣東 晉志誤于汝南郡陽安
縣下註云故江國與
地志襲其訛繆甚

舒

僖三年徐人取舒杜註舒國今廬江舒縣臣謹

按舒偃姓國臯陶之後其族屬甚多此則見經之

始魯頌曰戎狄是膺荆舒是懲則莫我敢承鄭氏

箋曰魯僖公與齊桓公舉義兵北當戎與狄南艾

荆及羣舒天下無敵禦也正當為此時事矣丈十

二年羣舒叛楚子孔執舒子平及宗子遂圍巢杜

註羣舒偃姓舒庸舒鳩之屬今廬江南有舒城西

南有龍舒城宗巢二國羣舒之屬孔疏述世本曰

偃姓舒庸舒蓼舒鳩舒龍舒鮑舒龔以其非一故

言屬以包之十四年楚子孔潘崇將襲羣舒使子

燮與子儀守而伐舒蓼杜註舒蓼即羣舒宣八年

楚為衆舒叛故伐舒蓼滅之楚子疆之及滑汭杜

註舒蓼二國名孔疏曰二國傳寫之誤當云一國

是也孔氏又云即文五年所滅之蓼時復故而楚

更滅之亦誤也蓼在安豐羣舒在廬江地境各別

無容相混也成十七年舒庸人以楚師之敗也道

吳人圍巢伐駕圍釐虺恃吳而不設備楚公子橐
師襲舒庸滅之杜註時楚敗于鄢陵舒庸東夷國
人襄二十四年吳人召舒鳩人舒鳩人叛楚楚子
師于荒浦使沈尹壽與師祁黎讓之舒鳩子敬逆
二子而告無之楚師還二十五年舒鳩人卒叛楚
楚令尹子木伐之及離城吳人救之居其間七日
子疆擊敗吳師遂圍舒鳩舒鳩潰八月楚滅舒鳩
杜註荒浦離城皆舒鳩地定二年吳子使舒鳩氏
誘楚人曰以師臨我楚師于豫章吳敗之杜註舒
鳩楚屬國蓋楚雖滅之猶存其祀故為屬國也杜
氏但以漢舒縣為古舒國餘羣舒惟巢國有註今
別見其舒蓼舒庸舒鳩及宗四國又荒浦離城二
地皆不能明其處但云廬江南有舒城及龍舒城
約畧四國所居在此兩城間而已今亦姑如其意
以繹之秦舒邑屬九江郡漢五年以舒屠六是也
七年封兄子信為羹頡侯食舒後置舒縣為廬江

郡治文帝分淮南為廬江國封淮南厲王子賜為廬江王居舒元狩初復為郡後漢初李憲稱帝于舒馬成攻拔之建安四年孫策襲廬江取之時郡仍治舒也三國魏移郡治陽泉而虛其地正始四年吳諸葛恪屯皖欲圖壽春司馬懿將兵入舒以禦之晉仍置舒縣于此梁陳間廢唐復置舒城縣屬廬州今仍之屬廬州府此即杜所云舒國也杜又云廬江南有舒城則不知其處龍舒亦漢縣屬廬江郡後漢永平初封許昌為龍舒侯邑于此晉仍曰龍舒縣屬廬江郡東晉末廢今其故城在廬江縣東一百二十里

弦

僖五年楚人滅弦弦子奔黃杜註弦國在弋陽軹縣東南臣謹按左傳云于是江黃道栢皆弦姻也弦子恃之而不設備故亡漢軹縣屬江夏郡軹音義地理志云故弦國也為楚所滅晉初屬弋陽

郡後屬西陽國劉宋孝武帝自此伐逆即位改曰
 孝寧齊因之仍屬西陽郡後周廢今其故城在黃
 州府蘄水縣東三十里 再按劉昫曰軹縣古城
 在仙居北十里仙居劉宋所置縣宋建炎中省其
 故城在今光山縣西今光州西南有弦城因與光
 山相接界也唐常置弦州于此未知孰是劉氏曰
 光山有軹縣城乃後
 代僑置非漢故縣也

道

見上杜註道國在汝南安陽縣南 臣謹按安陽
 當作陽安蓋傳寫之誤也漢志陽安縣屬汝南郡
 應劭曰陽安有道亭故道國後魏置陽安郡隋縣
 省章懷太子曰陽安故城在朗山縣東北朗山縣
 隋置于漢之朗陵縣地唐屬蔡州宋改為確山縣
 寰宇記道城在確山縣北二十里今確山縣屬汝

府 寧

柏

見上杜註柏國在汝南西平縣臣謹按西平漢縣屬汝南郡應劭曰有柏亭故柏國也隋屬蔡州

今屬汝寧府

柏亭在縣西

春秋地名攷畧卷十三

欽定四庫全書

春秋地名攷畧卷十四

詹事府詹事高士奇撰

諸小國下

鄆

僖十四年季姬及鄆子遇于防使鄆子來朝杜註鄆國今瑯琊繒縣臣謹按鄆穀梁作繒國語或

作鄆或作繒姒姓禹後子爵衛成公欲祀相甯武子曰杞鄆何事史伯曰杞繒由太姒蓋亦封于周初因武王之母家也其初封姒不在瑯琊鄭桓公當幽王時而史伯告之曰申繒西戎方強王若伐申而繒與西戎會之周不守矣史記申侯與繒西夷犬戎攻幽王殺王驪山下當是時申伯初受改

封之命國于謝在楚方城之內度繒國必與之相近故得偕舉兵哀四年楚致方城之外于繒關宣其故墟乎其徙於瑯琊也不知在何時當亦如杞之自雍丘徙至東國耳季姬過防釋之者有二義左傳曰鄆季姬來寧公怒止之以鄆子之不朝也十五年季姬歸於鄆杜註來寧不書而後書歸于鄆更嫁之文也明公絕鄆昏既來朝而還穀梁傳曰遇者同謀也來朝者來請已也范甯曰魯女會諸侯得滌通使來朝請已為妻也甯又曰左氏近合人情是也十六年鄆季姬卒城鄆役人病不果城而還十八年鄆子會盟于邾邾人執鄆子用之宣十八年邾人戕鄆子于鄆成二年及鄆人盟于蜀襄四年晉侯享公公請屬鄆益獻子曰鄆無賦于司馬寡君願借助焉孔疏曰小國不得自通多附于大國如二十七年齊人請邾宋人請滕是也冬邾人莒人伐鄆滅純救鄆敗于狐貽五年穆叔

覲鄆太子于晉以成屬鄆六年莒人滅鄆此亦有
二義左傳曰莒恃賂也晉人以鄆故來討曰何故
亡鄆杜註鄆恃貢賦于魯而慢莒故滅晉以魯不
致力于鄆故來責穀梁傳曰莒人滅鄆非滅也立
異姓以蒞祭祀滅亡之道也范甯曰莒是繒甥立
以為後非其族類故曰滅然尋考後事鄆竟亡矣
八年莒人伐我東鄙以疆鄆田杜註莒既滅鄆魯
侵其西界故伐魯以正其封疆昭四年取鄆傳曰
莒亂著丘公不撫鄆鄆叛而來杜註鄆莒邑蓋此
時已屬莒為邑也十三年會于平丘叔向謂魯人
曰用諸侯之師因邾莒杞鄆之怒以討魯罪何求
而弗克魯人懼聽命杜註鄆已滅其民猶在故并
以恐魯哀七年夏公會吳于鄆吳來徵百牢蓋此
時鄆地猶屬魯魯應致地主之餼故吳有是舉也
秋魯入邾邾人請救于吳曰夏盟于鄆行秋而背
之西方諸侯其何以事君杜註鄆行即鄆也鄆盟

不書蓋以鄆國既亡微小其地而謂之鄆行也史記夫差七年敗齊師于艾陵遂至繒即此後為楚地漢置繒縣屬東海郡後漢屬瑯琊郡晉因之後廢隋復置鄆城縣大業初嘗置蘭陵郡尋併入承鄆縣初為山賊左君衡所據事平復置鄆城縣為鄆州治貞觀初州縣俱廢章懷太子曰鄆故城在承縣東北今嶧縣東八十里有鄆城再攷襄元年次于鄆乃鄭地別見

厲

僖十五年齊師曹師伐厲杜註厲楚與國義陽隨縣北有厲鄉臣謹按厲神農之後祭法云厲山

氏之有天下註厲山氏即神農也十六年齊伐厲不克救徐而還漢志隨縣故厲國詳見隨國條今隨州北四十里有厲山山下有厲鄉荊州記山有二穴神農所生謂之神農洞九域志自棗陽至厲鄉道路交錯號九十九岡今岡在州西北百八十里寰宇記厲鄉西有塹兩重塹中有神農宅宅中

有九井舊志厲山在
州西北百八十里

英氏

僖十七年齊人徐人伐英氏 臣謹按英氏或稱英臯陶後偃姓也 史記臯陶之後或封英六

張衡賦曰臯陶邁而種德兮樹德懋于英六是也
今廬州府六安州西有英氏城 再按臧丈仲闡

六與蓼滅嘆曰臯陶庭堅不祀忽諸司馬遷英布
傳贊曰英布者其先宣春秋所見楚滅英六臯陶

之後哉索隱曰或者
英後改號曰蓼也

項

僖十七年夏滅項杜註項國今汝陰項縣 臣謹
按項後為楚地項氏世為楚將封於項即此漢為

項縣治曹魏因之正元二年毋丘儉等起兵討司
馬師西至項甘露二年司馬昭奉車駕擊諸葛誕
于壽春至項晉咸寧五年伐吳以賈克節度諸軍
荊州平命克自襄陽移屯項尋為豫州治太元八

年符秦大舉入寇堅發長安至項城義熙十二年
劉裕伐秦前鋒檀道濟入秦境秦徐州刺史姚掌
以項城降宋元嘉二十七年魏拔項城秦始三年
拓拔石自懸瓠攻汝陰不克退屯陳項時陳郡治
項城也梁太清初侯景以北揚州歸梁時治項景
敗地入東魏隋志項城縣東魏置揚州兼置丹陽
郡及秣陵縣開皇初郡廢改秣陵為項城
縣置沈州治之尋廢唐屬陳州後皆因之

須句

僖二十二年公伐邾取須句杜註須句列國而削
弱不能自通為魯私屬若顓臾之比魯謂之社
稷之臣故滅奔及反其君皆畧而不書惟書伐邾
取須句又曰須句在東平須昌縣東北臣謹按
須句公羊作須胸左傳曰任宿顓臾須句風姓也
實司太皞與有濟之祀以服事諸夏邾人滅須句
須句子來奔因成風也成風為之言于公二十二
年春伐邾取須句反其君焉杜註四國伏羲之後

故主其祀封近于濟故世祀之須句成風家文五年夫人風氏薨杜註成風僖公母七年公伐邾取須句杜註須句魯之封內屬國也僖公反其君之後邾復滅之左傳取須句寘文公子焉非禮也杜註邾文公子叛在魯故公使為守須句大夫也絕太皞之祀以與鄰國叛臣故曰非禮然則須句仍滅矣汪氏曰魯取須句非存其祀實貪其土是也秦置須昌縣漢因之屬東郡高帝封功臣趙衍為侯邑後屬東平國晉為東平國治後魏為東平郡治北齊郡廢隋屬鄆州改縣曰宿城又別析置須昌縣唐移鄆州治須昌又再改宿城名曰東平尋併入須昌後唐改須昌為須城宋咸平三年以河患徙州治及須城縣俱遷故宿城地政和初升鄆州為東平府元改路明降州省附郭須城縣入之今仍為東平州屬兗州府再按水經注曰杜預謂須胸在須昌縣北非也地理志曰壽張縣西北

有胸城或曰須句初封濟水之陽
在壽張後遷濟水之陰在須城

任

見上杜註任今任城縣也 臣謹按任至戰國時
猶存為齊附庸孟子居鄒季任為任處守是也漢
置縣屬東平國後漢元和初為任城國晉因之後
國廢縣存後魏復置任城郡高齊改置高平郡治
馬隋郡廢縣屬兗州唐因之宋屬濟州金為州治
元徙濟寧路治此明改府又改州省附郭任城縣
入之今仍為濟寧州 再按水經注黃水逕亢父
故城西夏后氏之任國也漢章帝別為任城縣王
莽之延就
亭也似誤

顓臾

見上杜註顓臾在泰山南武陽縣東北 臣謹
按顓臾在蒙山之陽魯附庸國論語季氏將伐

武陽漢縣屬泰山郡後漢及晉因之劉宋曰武陽
顓臾又曰夫顓臾昔者先王以為東蒙主即此南

縣後魏屬泰山郡隋改額史縣屬沂州貞觀初省入費縣今費縣西北八十里有額史城南武陽城

在額史城

東南十里

頓

僖二十三年楚人伐陳傳曰城頓而還杜註頓國今汝陰南頓縣臣謹按僖二十五年楚人圍陳

納頓子於頓杜註頓迫于陳而出奔楚故楚圍陳以納頓子襄四年從諸侯會于召陵侵楚昭四年五年皆從楚伐吳二十三年為吳敗于雞父定四年楚人使頓間陳而侵伐之陳人圍頓十四年楚公子結陳公孫佗人帥師滅頓以頓子牂歸傳曰頓子牂欲事晉背楚而絕陳好楚滅頓漢置南頓縣屬汝南郡漢志曰故頓子國姬姓應劭曰頓迫于陳其後南徙故號南頓故城尚在蓋頓國南徙即在楚納頓子時也光武父欽令此曰南頓君後漢亦曰南頓縣建武十九年幸南頓曹魏正始二

年毋丘儉舉兵壽春王基謂司馬師宜速據南頓從之卒破儉晉惠帝置南頓郡北齊罷改縣曰和城屬信州隋屬陳州仍為南頓縣唐省復置光武縣以縣有光武鄉也尋復舊仍屬陳州元末改置商水縣于此今仍之屬陳州再按晉書南頓縣屬汝南郡杜云汝陰當是曹魏改名也

雍

僖二十四年富辰曰周公弔二叔之不咸故封建宗族以藩屏周管蔡邲霍魯衛毛聃郟雍曹滕畢原豐郟丈之昭也邲晉應韓武之穆也凡蔣邢茅昨祭周公之脣也杜註二叔夏殷之叔世雍國在河內山陽縣臣謹按孔疏此言文武周公之子孫為二十六國也自武王克商下及成康封建乃畢富辰盡以屬之周公蓋謂武王克殷周公所輔又攝政制禮成一代大法故以歸之也昭二十八

年傳曰武王克商光有天下兄弟之國十有五人姬姓之國四十人昭二十六年傳曰昔武王克殷

成王靖四方康王息民並建母弟以藩屏周昭九年傳曰武王成康之建母弟以藩屏周為說固不同矣鄭衆賈逵皆以二叔為管蔡弟觀封建之中現有管蔡豈可言因其作亂而封建乎馬融以為夏殷叔世而杜從之是也諸大國若魯衛曹滕晉蔡邢邠皆獨見霍邵亦別見管見鄭地毛原邠凡祭地期思皆不再及特疏其未備者今懷慶府

修武縣西
有雍城

毛

見上又本年傳頽叔桃子以狄師伐周大敗周師獲周公忌父原伯毛伯富辰杜註原毛皆采邑

臣謹按史記武王克商入立於社南毛叔鄭奉明水此即毛國始封之君也成王顧命毛伯班第六領司空文元年天王使毛伯來錫公命杜註毛國伯爵諸侯為王卿士者孔疏云僖二十四年有毛

伯杜註采邑此毛與彼計是一人而註不同者此
毛當是文王之子封為畿外之國而本封絕滅常
稱毛伯國名尚存仍為伯爵復得采邑為畿內諸
侯故彼云采邑此云國也文九年毛伯來求金宣
十五年王子札殺召伯毛伯昭十八年周毛得殺
毛伯過杜註伯過周大夫得過之族二十六年尹
氏召伯毛伯以王子朝奔楚蓋世仕于王朝矣但
毛伯故封則不知所在或云秦州藉水旁有毛泉
近上邽或曰在河
南府宜陽縣境

附

上見

畢

見上杜註畢國在長安縣西臣謹按周本紀武
王入商紂宮周公把大鉞畢公把小鉞以夾武王
康王即位太保率東方諸侯入應門左畢公率西
方諸侯入應門右康王十二年以成周之衆命畢

公保釐東郊蓋畢公之親賢亞于周召矣乃史記
魏世家云畢公高與周同姓武王伐紂而高封于
畢為畢姓似非文王子者此史文之疎也竹書穆
王十四年狄人侵畢後不知何以亡史記曰其後
絕封為庶人或在中國或在夷狄其裔孫曰畢萬
事晉獻公漢長安縣為京兆尹治晉為京兆郡治
劉向言文武周公葬于畢師古釋之曰在長安西
北四十里以地計之為今之咸陽矣今咸陽縣北
五里有畢原書注周公葬于畢原南北數十里東
西二三百里亦謂之畢陌通典曰文王葬畢初王
季都之後畢公高封焉縣志渭水經城南九變甘
泉諸山控城北畢原即九變諸水之麓也亦謂之
咸陽北阪漢武又更名為渭城北阪王氏曰畢原
無山川陂湖井深五十丈秦謂之池陽原漢曰長
平阪石勒建石安縣于此又名石安原元和志咸
陽縣治乃畢原也蓋畢原之境廣矣或有謂畢原

在渭南者詩鄭註果終南之道也皇覽曰文王葬畢在鎬東南杜中汲冢古文畢西于豐三十里括地志畢原在萬年縣西南二十八里謂畢地延袤跨渭南北本無足疑惟文武葬處傳聞異辭不能深考矣畢國封處大約當在此

鄠

見上杜註鄠國在始平鄠縣東臣謹按此即文王所宅之鄠邑也本崇國文王克崇而都之故詩曰既伐于崇作邑于鄠僖十九年子魚謂宋襄公曰文王聞崇德亂而伐之軍三旬而不降退修教而復伐之因壘而降襄三十一年北宮文子言于衛侯曰文王伐崇再駕而降為臣即其事也武王既遷鎬京乃封其弟于此竹書成十九年王巡狩侯甸四岳召康公從歸于宗周遂正百官黜鄠侯蓋國除久矣宣八年晉趙穿帥師侵崇杜註崇秦與國蓋復居鄠而襲崇之舊號者鄠縣見周地

邠

見上

邠

見上

應

見上杜註在襄城城父縣西南臣謹按韓詩外傳成王戲第以桐葉圭封之周公曰天子無戲言

王應聲而對之曰應侯考翦桐事呂氏春秋史記皆以為叔虞外傳妄也又汲冢古文殷時有應國

蓋即舊墟以封矣魏惠王六年與秦會應襄王十一年復與秦武王會于應又客請周最以應為秦

王太后養地秦昭王時范雎封于此曰應侯漢父城縣屬潁川郡地理志有應鄉古應國晉屬襄城

郡杜作城父似小訛劉宋省水經注渚水逕魯陽縣又東逕應城今應城在汝州魯山縣東三十里

括地志應國因應山而名距縣里數與今同

韓

見上

蔣

見上蔣在弋陽期思縣臣謹按周公第五子伯齡封于蔣為蔣男以有功進爵為侯莊公時楚滅之為期思縣漢期思縣屬汝南郡師古曰故蔣國詳見楚地再按開封府尉氏縣西六十里有蔣

城迷征記

曰即蔣國

茅

見上杜註高平昌邑縣西有茅鄉臣謹按茅國茅伯所封後為邾邑哀七年茅成子以茅叛是也

昌邑漢縣屬梁國武帝封子壽為昌邑王徵為昭帝嗣罪廢國除為山陽郡晉秦始初為高平國治劉宋省入金鄉今金鄉縣西北四十里有昌邑城又有茅鄉城即古茅國也

胙

見上杜註東郡燕縣西南有胙亭臣謹按漢置南燕縣屬東郡東漢改燕縣晉省隋置胙城縣屬

滑州唐宋因之金屬開封府又嘗徙衛州治此元仍還汲縣今屬懷慶府縣南有舊胙城劉昭曰南

燕有胙城古胙國也隋蓋取以名縣

祭

見上

郟

見楚地

夔

傳二十六年楚人滅夔以夔子歸杜註夔楚同姓國今建平秭歸縣臣謹按左傳夔子不祀祝融

與鬻熊楚人讓之對曰我先王熊摯有疾鬼神勿赦而自竄于夔吾是以失楚又何祀焉楚成得臣鬬宜申帥師滅夔以夔子歸杜註祝融高辛氏之火正楚之遠祖也鬻熊祝熊之十二世孫夔楚之別封故亦世紹其祀熊摯楚嫡子有疾不得嗣位故別封為夔子孔疏曰高陽之後重黎為高辛氏

小正帝嘗命曰祝融後重黎誅弟鬻熊孫熊繹封楚故祝融鬻熊皆為楚之遠祖也自祝融至鬻熊無世數杜言十二世不知出何書劉炫計其時得千二百年不應止傳十二世孔以為兄弟伯叔相繼其間故年多而世少也孔又曰熊摯封夔世家無其事不知為何君之適何時封夔惟鄭語孔晁註云熊繹玄孫曰熊摯有疾楚人廢之立其弟熊延熊摯自棄于夔子孫有功王命為夔子不知其何據也臣再按楚世家熊繹五傳為熊渠渠長子康早卒中子熊摯紅立摯紅卒弟熊延代立是則熊摯即所謂熊摯紅也熊摯紅初封鄂王又立為君而死其非夔之始祖明矣蓋孔晁妄也夔地即楚之丹陽為熊繹始封之地當時熊摯自竄不過避居國都之側楚人因而封之及其後楚國徙于枝江夔乃獨為一國然則夔以世守宗邑而承祀尤為不可廢墜也夔既滅其地為歸鄉宋忠曰

歸即夔也漢置秭歸縣屬南郡地理志古夔國孟康曰秭音姊孫吳以後嘗為建平郡治沿革詳見楚都今為歸州治東二十里有夔子城水經注江水東南經夔子城南其城跨據川阜周迴一百八十步又州志云州西三里有夔子城地名夔沱宋端平間徙州治此州東南七里即丹陽城漢益州都尉治魚復在歸州之西公孫述自以承漢土運白龍出井中號魚復曰白帝城先主改為永安蕭梁置信州唐改夔州今為夔州府遙取夔國為名也

介

僖二十九年介葛盧來杜註介東夷國也在城陽黔陬縣臣謹按左傳介葛盧來舍于昌衍之上

冬介葛盧復來朝介葛盧聞牛鳴曰是生三犧皆用之矣其音云問之而信杜註傳言人聽或通鳥獸之情孔疏周禮夷隸掌與鳥言貉隸掌與獸言鄭氏曰夷隸征東夷所獲貉隸征東北夷所獲介

葛盧東夷故能曉之也三十年介人侵蕭漢黔陬縣屬瑯琊郡地理志故介國也後漢屬東萊郡晉屬城陽郡隋省入膠西縣今高密縣西六十里有黔陬城膠州南七十里有介亭高密與膠州連壤也

姜戎

見前

沈

文三年叔孫得臣會諸國伐沈沈潰杜註沈國名汝南平輿縣北有沈亭臣謹按左傳以其服于

楚也成八年晉侵沈沈獲沈子揖襄二十八年蔡聲

子曰析公為晉謀主繞角之役晉遂侵蔡襲沈獲

其君即此事也二十八年沈子朝于晉以宋之盟

故昭四年五年皆從楚伐吳十三年楚靈王遷沈

于荆山平王立而反之二十三年吳敗諸國之師

于雞父沈子逞滅定四年蔡公孫姓帥師滅沈以

沈子嘉歸傳曰沈人不會于召陵晉人使蔡伐之
夏蔡滅沈秋楚為沈故園蔡會吳入郢蓋楚師于
是遂罷矣史記蔡昭侯十三年與晉滅沈是也後
屬楚為平輿邑秦始皇二十二年李信攻楚平輿
明年王翦擊荆取陳以南至平輿漢置平輿縣屬
汝南郡應劭曰故沈子國今沈亭是也後漢書曰
沈姬姓光武封姚期為平輿侯晉仍為平輿縣屬
汝南郡亦謂之懸瓠城南北用兵懸瓠為必爭之
地高齊縣廢隋復置仍屬汝南郡唐屬豫州宋省
入汝陽縣今汝寧府治東南有平輿故城在汝水
之南岸沈亭在其北又陳州沈丘縣亦沈國地先
為楚得別見楚地中又金天氏之後有沈封于
汾州晉滅之此別一沈沈

約自序合而為一非是

六 文五年楚人滅六杜註六國今廬江六縣 臣謹
按左傳六人叛楚即東夷春秋楚成大心仲歸帥師

滅六冬楚公子變滅蓼臧文仲聞六與蓼滅嘆曰
臯陶庭堅不祀忽諸世紀六偃姓子爵臯陶次子
甄是為仲甄封于六是也六既滅地入於楚史記
楚昭王五年吳伐楚取六秦為六縣屬九江郡漢
初項羽大司馬周殷叛楚以舒屠六漢封黥布為
淮南王都六武帝時為六安國治地理志六縣古
國也後漢為六安侯邑屬廬江郡三國魏為六安
縣吳嘉禾赤烏間全琮諸葛恪再攻六安不克晉
復為六縣仍屬廬江郡東晉末省入安豐皇覽曰
六有臯陶冢梁於其地置岳安縣隋改霍山屬廬
州唐改為盛唐縣屬壽州移治騶虞城宋改為六
安縣政和中置六安軍元升為州明省附郭六安
縣入之括地志故六城在壽州安豐縣南百三十
里蓋即所謂騶虞城今之六安州也近志云古
六城在舒城東南六十里似誤寰宇記舒城西南
二十里有高陽城相傳為高陽氏封其子處亦無

考可

蓼

見上杜註蓼國今安豐蓼縣 臣謹按漢蓼縣高祖封孔哀為侯邑尋屬六安國地理志故國也後

漢屬廬江郡晉屬安豐郡後廢宋泰始二年呂安國擊龐孟蚪于蓼潭大破之水經注決水經蓼縣

故城東灌水會焉所

謂蓼潭當是其處

麋

文十一年春楚子伐麋 臣謹按麋公羊作園左傳厥貉之會麋子逃歸十一年春楚子伐麋成大

心敗麋師于防渚潘崇復伐麋至錫穴杜註錫穴麋地蓋即麋之國都矣十六年麋人率百濮聚于

選蓋麋猶存漢錫縣屬漢中郡應劭曰音陽師古曰即春秋之錫穴也後漢因之晉初亦為錫縣屬

魏興郡尋改郾鄉隋屬均州唐嘗置南豐州不久罷仍屬均州宋因之景定以後僑徙不一元置郾

縣至明皆屬均州成化中始為鄖陽府治水經注
漢水經錫縣北白石灘又東逕長利谷錫縣故春
秋之錫穴也有錫義山方圓百里形如城八面有
門上有石壇高十餘丈列仙所居再按穎容釋
例曰麋當陽也今當陽東南六十里有麋城宋白
曰楚伐麋即此尋考經文原作麋字安得訛而為
麋麋本小國果在當陽豈能遠屬二邑于數百里
外乎或言麋城為三國時麋芳所築斯言可信
再按定五年吳入郢吳師敗楚師于雍澁秦師又
敗吳師吳師居麋杜註麋地名雍澁在安陸府境
麋地亦不能至此當是麋滅之
後楚人遷之以來如羅郡類耳

防渚

見上杜註麋地臣謹按杜佑曰房陵即春秋
時麋國地所謂防渚者也關駟曰防即房陵也

房陵秦縣始皇徙趙王遷于房陵即此後呂不韋
之家亦徙焉漢仍曰房陵屬漢中郡先主置房陵

郡孟達據以降魏魏改為新城郡以達為新城太守梁置岐州西魏改縣名曰光遠隋改房州唐仍之復改縣曰房陵唐武后遷中宗於此宋置保康軍元仍曰房州已省房陵縣入州明改州為縣今仍為房縣屬鄖陽府

錫穴

上見

鄭瞞

文十一年鄭瞞侵齊遂伐我叔孫得臣敗狄于鹹獲長狄僑如杜註鄭瞞狄國名防風之後漆

姓僑如鄭瞞之君蓋長三文臣謹按魯語吳伐

越墮會稽獲骨節專車吳子使問之仲尼客執骨

而問曰敢問骨何為大仲尼曰丘聞之昔禹致羣神于會稽之山防風氏後至禹戮之其骨專車此

為大矣客曰防風氏何守也曰汪芒氏之君也守封隅之山者也為漆姓在虞夏商周為汪芒氏于

周為長狄今為大人客曰人長之極幾何曰僬僥
氏長三尺短之至也長者不過十之數之極也杜
氏所稱鄭瞞之祖本于此矣穀梁傳曰不帥師而
曰敗者直敗一人之辭也叔孫得臣最善射者也
射其目身橫九畝斷其首而載之眉見於軾公羊
傳曰狄者何長狄也兄弟三人一之齊一之魯一
之晉何以書記異也蘇氏曰猶史記云秦時有大
人十二見於臨洮所以為記異也左傳又云宋武
公之世彫班獲長狄綠斯晉之滅潞也獲僑如之
弟焚如齊襄公之二年王子成父獲其弟榮如衛
人獲其弟簡如鄭瞞由是遂亡是說也孔穎達常
疑之以為綿歷四代世為國主安得更無支屬僅
獲數人而云其種遂絕也且既謂之君方以類聚
不應獨立三文之君而收八尺之民臣愚以為孔
子約言十倍僬僥為數之極而杜氏遂定為三丈
何休且言長百尺皆妄也孔氏復加較量益愚矣

至其族屬必是無多故得一專車之骨遂以為異且公穀明言兄弟三人矣復何疑乎禹致羣神于會稽帝昭謂主山川之君為羣神之主非也直是會祭山川之神耳昭元年趙孟適南陽將會孟子餘杜註孟子餘趙衰也趙武之曾祖家廟在南陽往會祭之即其說矣封隅之山韋昭以為在吳郡永安縣蓋古居一方春秋之世散屬諸國至夫差時世已無復見聞故必待大聖之博雅始能辨之也再按杜註晉滅潞在宣十五年齊襄公二年為魯桓公之十六年而榮如則焚如之弟也榮如以桓十六年死至宣十五年一百三歲其兄猶在是則形質年壽皆不同于人穀梁以為紀異洵非妄也

舒蓼

見前

巢

文十二年楚人圍巢杜註巢吳楚間小國廬江六縣東有居巢城臣謹按巢國蓋古有之芮伯作

旅巢是也成七年吳始伐楚伐巢十七年舒庸以楚師之敗道吳人圍巢襄二十五年吳子過伐楚門於巢巢牛臣隱于短垣以射之卒三十一年趙文子問屈狐庸曰巢隕諸樊即此事也昭四年遂啟疆城巢五年楚使沈尹射待命于巢二十四年吳滅巢二十五年楚使熊相祺郭巢蓋巢已亡而楚欲據其地也史記吳公子光六年大敗楚軍于豫章取楚之居巢而還自是巢入于吳矣秦為居巢縣亦曰居鄴范增居鄴人也漢仍為居鄴縣屬廬江郡後漢永平中徙封劉般為居巢侯邑于此建安三年袁術以周瑜為居巢長二十二年操軍居巢尋引還留夏侯惇督二十六軍屯居巢晉初仍屬廬江郡尋廢今巢故城在巢縣東北五里

宗

見前

庸

文十六年楚人秦人巴人滅庸杜註庸今上庸縣屬楚之小國臣謹按左傳楚大饑戎伐其西南

庸人率羣蠻以叛楚麋人率百濮聚于選楚使盧戢黎侵庸及庸方城又與之遇七遇皆北惟裨僚魚人逐之庸人曰楚不足與戰矣遂不設備秦人巴人從楚師羣蠻從楚子盟遂滅庸楚之益強實由于此宣十二年戰于郟欒武子曰楚自克庸以來其君無日不討國人而申徹之蓋其視此役也綦重矣庸本古國武王伐紂庸蜀從之秦置上庸縣楚靳尚謂秦將以上庸六縣易張儀史記秦昭襄王二年與楚上庸又三十四年秦與韓魏上庸地即此漢置上庸縣屬漢中郡後漢因之曹操置上庸郡建安十四年先主遣孟達攻下房陵又使劉封自漢中乘沔水會達攻上庸上庸太守申耽

降晉宋以後皆為上庸郡治梁改縣曰新豐西魏復故屬羅州周又改孔陽隋復故屬房州唐因之宋開寶中廢入竹山縣今上庸故城在鄖陽府竹山縣東四十里水經注堵水逕房陵縣又東北逕上庸郡故庸國也其城三面際水有白馬山山石似馬謂之白馬塞孟達登之而嘆曰劉封申耽據金城而更失之蓋降魏後語也章懷太子曰古上庸城在永清縣西永清後魏置其故城在房縣

東百十里

庸方城

見上杜註方城庸地上庸縣東有方城亭臣謹按水經注堵水又東逕方城亭而東北

歷崧山下又北逕堵陽縣注于漢謂之堵口今竹山縣東四十五里有方城山上平坦四面險固山南有城周十餘里即春秋時庸方城也又縣西五里有庸城山庸人昔居于此于山下置鼓又名懸

山 鼓

裨

僚

魚

見上杜註裨僚魚庸三邑臣謹按魚復也漢置魚復縣屬巴郡今為夔州

府奉節縣即府治也詳夔國府東有魚復浦又有魚復城在赤甲山下

羣蠻

見上臣謹按後漢書南蠻傳槃瓠之種曰精夫相呼為蚺徒今長沙武陵蠻是也其在唐虞

與之要質曰要服宣王命方叔南征詩人所謂蠻荆來威者也平王東遷侵暴上國晉文侯輔政乃率蔡共侯擊破之至楚武王時蠻與羅子共敗楚師殺其將屈瑕莊王初立民饑兵弱復為所寇楚師既振然後乃服自是遂屬于楚鄂陵之役蠻與共王合兵擊晉及吳起相悼王南并蠻越遂有洞庭蒼梧秦昭王使白起伐楚略取蠻夷始置黔中郡漢興改為武陵章懷太子注曰楚屈瑕伐羅羅

與盧戎兩軍之大敗之所謂共敗屈也鄢陵之戰晉卻至曰鄭陳而不整蠻軍而不陳所謂合兵擊晉也黔中故城在今辰州沅陵縣西臣再攻盧戎在楚之盧地別見楚地中然杜註云盧戎南蠻蓋亦欲自同于范矣世家楚莊王三年滅庸此云民饑而為寇正指此事時羣蠻來自西南而率之者庸也故為賈請先攻庸所謂救國不搏機批亢持虛形格勢禁則自解者也及羣蠻從楚子盟而庸遂滅蓋自此蠻服楚矣至漢曰五溪蠻服于先王隋置辰州唐復置錦州溪州宋又置沅州今辰沅諸境所隸之蠻峒長官即羣蠻也

百濮

見上杜註百濮夷也臣謹按周書伊尹為四方獻令正南甌鄧桂國損子產里百濮九國請

今以珠璣瑋瑁象齒文犀翠羽菌鶴短狗為獻牧誓咨爾庸蜀羌茅微盧彭濮人孔傳庸濮在江漢

之南國語蚡冒于是始啟濮帝注濮南蠻之國史
記楚文王始開濮地而有之昭元年魯為邾所愬
趙孟為魯請于楚曰吳濮有釁楚之執事宜其顧
盟杜註吳在東濮在南今建寧郡南有濮夷九年
詹桓伯曰巴濮楚鄧吾南土也十九年楚子為舟
師以伐濮杜註濮南夷杜氏三註不同蓋以種族
不一故稱百濮約言其地當在楚之南境而迤西
矣晉建寧郡在今雲南界極言所至常在此也左
思三都賦曰左綿巴中百濮所充劉注云今巴中
七姓有濮是蓋百濮之一種轉徙于此非春秋所
矣云

赤狄

見唐
谷如

邾

宣四年公及齊侯平莒及邾臣謹按昭十七年
邾子來朝昭子問馬曰少皞氏鳥紀官何故也邾

子曰吾祖也吾知之吾高祖少皞擊之立也鳳鳥適至故紀於鳥為鳥師而鳥名杜註少皞金天氏黃帝之子已姓之祖也孔氏以世本春秋緯皆言青陽即少皞代黃帝有天下已姓而晉語則云青陽與黃帝同德姬姓疑其為說不同今考晉語司空季子曰黃帝之子二十五人其同姓者二人而已青陽與夷鼓皆已姓青陽方雷氏之甥也夷鼓彤魚氏之甥也固已定為已姓矣乃後又云其同姓而異姓者四母之子別為十二姓凡黃帝之子二十五宗其得姓者十四人為十二姓姬酉和已滕箴任荀僖媯嬛依是也惟青陽與蒼林同于黃帝故皆為姬姓同德之難也如是一青陽也而前云已姓後云姬姓誠為難解今據韋注青陽夷鼓二人相與同德故俱為已姓青陽少昊也又云青陽倉林德及黃帝故同為姬姓又云十四人而二人為姬二人為已故十二姓然則前青陽與後青

陽判然兩人矣史記云黃帝正妃生二子其後皆有天下曰玄囂是為青陽降居江水漢書曰黃帝之子青陽其子孫名摯是為少皞是少皞出于前青陽久為定解而杜氏謂少皞為黃帝子則用世本蓋諸書必參互而後明也宣十六年郟伯姬來歸成七年吳伐郟八年叔孫僂如會齊師伐郟襄七年郟子來朝昭十六年徐子及郟人盟于蒲隧哀十年公會吳子邾子郟子伐齊南鄙戰國策楚人說頃襄王膺擊郟國大梁可得而有竹書晉烈公四年越子朱句滅郟秦二世二年秦嘉等起兵圍東海守于郟漢置郟縣為東海郡治地理志曰故郟國也東漢初董憲據郟劉永立為海西王建武五年董憲與劉紆敗于昌慮走保郟帝幸郟留吳漢攻圍之漢拔郟董憲走朐初平四年徐州牧陶謙自彭城走保郟曹操攻之不克興平元年曹操復擊破劉備于郟東皆此地也東魏改為郟

郡治隋廢郡以縣屬泗州唐并廢縣元末復置屬沂州今仍之故郟城在沂沭二水間城周十餘里西城戍城冢記郟城在沂沭二水間城周十餘里西南去邳州八十里今與南直邳州接界再按班志郟嬴姓國益因史遷秦本紀贊中有徐氏郟氏也誤

良

昭十二年晉侯將會吳子于良水道不可吳子辭乃還杜註下邳有良城縣臣謹按哀十五年楚伐吳陳侯使公孫貞子弔馬及良而卒史記楚王無疆謂齊威王使者曰願齊之試兵莒地以聚常郟之境常即良也戰國時為齊邑司馬貞曰常田丈封邑也漢置良成縣屬東海郡師古曰即晉將會吳處也後漢屬下邳國晉曰良城縣隋屬下邳郡唐廢今邳州北六十里有良城萊宣七年齊侯伐萊杜註萊國今東萊黃縣臣謹按禹貢萊夷作牧史記太公封營丘萊人來伐與

之爭管丘營丘邊萊萊人夷也會紂之亂而周初
定未能集遠方故與齊爭國是萊國在周之前矣
宣九年齊侯伐萊成十八年王湫奔萊襄二年齊
侯伐萊萊人賂夙沙衛以索馬牛皆百匹齊師乃
還夏齊姜薨齊侯使諸姜宗婦來送葬召萊子萊
子不會故晏弱城東陽以逼之依此則萊國姜姓
也孔疏言齊侯召萊子不為其姓姜似誤六年齊
侯滅萊左傳萊恃謀也於鄭子國之來聘也晏弱
城東陽而遂圍萊王湫帥師及正輿子棠人軍齊
師齊師大敗之入萊萊共公淳柔奔棠陳無宇獻
萊宗器於襄官晏弱圍棠滅之遷萊于郟杜註恃
謀恃賂夙沙衛之謀也子國聘魯事在五年二年
晏弱城東陽至五年四月復托言治城因遂圍萊
蓋萊甚險固故圍之經年而後克也十四年衛獻
公奔齊齊人以邾寄衛侯杜註邾即所滅萊國襄
二十八年齊慶封田於萊定十年齊侯使萊人以

兵劫魯侯孔子以公退曰士兵之兩君合好而裔夷之俘以兵亂之非齊君所以命諸侯也齊侯聞之遽辟之杜註萊人齊所滅萊夷也哀五年齊置羣公子于萊杜註萊東鄙邑秦于此置黃縣史記秦伐匈奴使天下飛芻輓粟起于黃腫即此漢屬東萊郡有萊山史記封禪書齊公祀六曰月主祀萊山中公曰天下名山八三在島夷五在中國東萊五山之一也元封初東巡海上公孫卿持節先行候名山至東萊漢郊祀志神爵元年從方士言祀萊山一名萊陰山亦曰龍門山後漢黃縣為東萊郡治晉仍屬東萊郡隋屬萊州尋改牟州唐因之神龍二年改置蓬萊縣於蓬萊鎮登州治焉先天元年復析置黃縣于今治今亦曰黃縣屬登州府故黃縣在縣東二十五里又縣東南二十里有萊子城即龍門山也山峽巉巖盤石通道極為險峻俗名萊子關

棠

見上杜註棠菜邑也北海即墨縣有棠鄉臣謹按襄十八年諸侯同圍齊齊侯駕將走郵棠杜註

郵棠齊邑或言即菜棠也今膠州即墨縣南八十里有甘棠社即古棠鄉

郛

見上杜註遷萊子於郛國臣謹按孔疏郛小邾也二年傳曰滕薛小邾之不至者皆齊故也小邾

附屬於齊故滅萊國而遷其君于小邾使之寄居以終身也或曰今萊州府治即春秋時齊之郛邑

根牟

宣九年取根牟杜註根牟東夷國也今瑯琊陽都縣東有牟鄉臣謹按公羊根牟邾之邑

非也昭八年蒐于紅自根牟至於高衛革車千乘即此今莒州沂水縣東南有牟縣晉陽都縣見前

國陽

唐

宣十二年楚子使唐狡與蔡侯居告唐惠侯曰敢藉君靈以濟楚師使潘黨將游闕四十乘從唐侯

以為左拒杜註唐屬楚之小國義陽安昌縣東南
有上唐鄉臣謹按司馬貞曰唐本堯後封於夏
墟在今晉陽周成王滅之以封叔虞又分徙之於
許郢之間春秋唐惠侯是其苗裔也定三年唐成
公如楚有兩肅爽馬子常欲之弗與三年止之唐
人竊馬而獻之子常子常歸唐侯杜註成公惠侯
之後四年蔡侯吳子唐侯伐楚吳人郢五年秦子
蒲子虎帥車五百乘以救楚子期與子蒲滅唐哀
十七年楚子穀曰武王得觀丁父以服隨唐蓋唐
故楚之屬國也至是滅秦為隨縣地漢志曰蔡陽
縣之上唐鄉故唐國也師古曰漢紀云元朔五年
以零陵泠道之春陵鄉封長沙王子買為春陵侯
至戴侯仁以春陵地下濕上書請徙南陽元帝許
之以蔡陽之白水鄉徙仁為春陵侯由是復立春
陵縣屬南陽郡而上唐鄉在其境蘓伯阿過之曰
氣佳哉鬱鬱蔥蔥然即此東漢改曰章陵水經注

魏黃初二年改章陵曰安昌晉仍之屬義陽郡後廢後魏置潁西縣于下澧戍蓋其境內也隋改唐城屬漢東郡尋省括地志故唐城在棗陽縣東南百五十里開元中復置唐城縣屬隨州元省今為唐城鎮在隨州西北八十里蓋即古之上唐鄉也

黎

宣十五年伯宗曰狄有五罪棄仲章而奪黎氏地三也杜註黎氏黎侯國上黨壺關縣有黎亭臣

謹按昭四年會申傅商紂為黎之蒐東夷叛之即此竹書帝辛四年大蒐于黎是也詩式微序曰黎侯寓於衛其臣勸以歸也旄丘序曰責衛伯也狄人迫逐黎侯衛不能修方伯之職黎之臣子責之即此黎也詩譜次三詩于周桓王之世當衛宣公時蓋黎侯之先世矣赤狄潞氏奪黎侯之地又棄其賢人仲章晉聲罪伐之遂滅潞立黎侯而還漢壺關縣屬上黨郡應劭曰黎侯國也今黎亭是晉

仍之後魏徙治于羊腸坂其地遂虛今在壺關縣東南五十里後魏別置川陵縣于漢潞縣地云即黎城隋因改為黎城縣屬潞州唐宋因之今屬潞安府上黨記潞縣東北八十里有黎城括地志黎國在黎城縣東北八里今黎城縣東北八里有黎侯城壺關亦接壤地再按漢東郡有黎縣孟康曰即詩黎侯國也此蓋黎侯失國寓衛時所居式微篇胡為乎中露又曰胡為乎泥中毛萇曰中露泥中二邑名又曰衛處黎侯以二邑因安之而不歸故其臣勸之即其事也水經注瓠河自廩丘成都城又東逕黎侯故城南世謂黎侯城今在范縣界再按潞安府治西南三十五里有黎亭在黎侯嶺上晉永興二年劉淵以離石大饑徙屯黎亭即此蓋亦因黎國舊境而名

甲氏

見前阜落氏

留吁

見前
落氏

茅戎

見前
小戎

鄆

成六年取鄆杜註附庸國也臣謹按公羊以
為邾婁之邑非也或曰在今沂州郯城縣境

蠻氏

成六年晉伯宗夏陽說衛孫良夫甯相鄭人伊
雒之戎陸渾蠻氏侵宋杜註蠻氏戎別種也河

南新鄭縣東南有蠻城

臣謹按後漢志丈十七

年周敗戎于郊垂即此戎也

新城縣北有垂亭襄

五年王使王叔陳生愬戎於晉晉人執之以其貳

於戎也十六年楚子誘戎蠻子殺之公羊作戎曼

子左傳楚子聞蠻氏之亂也與蠻子之無質也使

然丹誘戎蠻子嘉殺之遂取蠻氏既而復立其子

焉禮也哀四年楚人既克夷虎乃謀北方為一昔

之期襲梁及霍單浮餘圍蠻氏蠻氏潰蠻子赤奔

晉陰地楚師臨上維晉士茂致九州之戎將裂田
以與蠻子而城之又將為之卜蠻子聽卜遂執之
與其五大夫以畀楚師于三戶司馬致邑立宗馬
以誘其遺民而盡俘以歸杜註夷虎蠻夷叛楚者
楚又詐為蠻子作邑立其宗主蓋古者致民常統
于宗也漢志河南新城縣曰蠻中故蠻子國後漢
志新城有鄢聚古曼氏東漢初祭遵獲山賊張滿
於鄢聚即此水經注汝水自梁縣東經麻解城北
故鄢鄉城也蠻麻聲近故誤耳章懷太子曰蠻
中聚在梁縣西南今南陽府汝州西南有蠻城
見上杜註梁河南梁縣西南故戎蠻子邑也臣
謹按梁本周邑時為蠻氏所據後屬楚國語惠王
以梁與魯陽文子文子辭曰梁險而在北境是也
惠王立于哀七年蓋自滅蠻氏梁即屬楚矣晉志
曰戰國時謂之南梁以別于大梁少梁也亦謂上
梁城渾曰鄭魏之弱楚以上梁應之史記魏伐趙

趙與韓共擊魏戰於南梁亦謂之三梁顏賈說穰
侯梁惠王伐趙戰勝三梁即此漢置梁縣屬河南
郡後漢建武二年封鄧禹為梁侯晉屬襄城郡唐
改承休縣為梁縣置汝州省梁入之今汝州西南
四十五里有梁城括地志同再按後漢志梁故
國伯翳後又有注城劉昭曰因梁伯好土功故梁
地多城此誤移秦
地之梁於此謬也

霍

見上杜註梁南有霍陽山亦蠻子邑臣謹按後
漢志梁縣有霍陽山水經注汝水經霍陽聚北世
謂之華浮城章懷太子曰霍陽城因山以名在梁
縣西南杜佑通典漢于山下立霍陽縣俗謂之張
侯城或曰東漢初蠻中山賊張滿屯於此
故有是名今霍山在汝州東南二十里

檀

咸十一年劉子單子謂卻至曰昔蘇忿生為司寇
與檀伯達俱封於河杜註俱封于河內也蓋在

今懷慶濟源縣境

無終

襄四年無終子嘉父使孟樂如晉因魏莊子納虎豹之皮以請和諸戎杜註無終山戎國名

臣謹按秦置無終縣項羽封韓廣為遼東王都無終漢初臧荼并其地漢臧荼亦置無終縣屬古北平郡後魏屬漁陽郡隋為郡治隋末廢唐乾封二年復置無終縣屬幽州萬歲通天二年改為玉田縣後嘗屬營州又改屬薊州至今因之今縣治西有古無終城

有窮

襄四年魏絳曰有窮后羿自鉏遷於窮石因夏民以代夏政杜註有窮國名后君也羿有窮君

之號鉏羿本國名臣謹按夏書太康畋于有洛之表十旬弗反有窮后羿因民弗忍距於河孔安國傳有窮國名孔穎達曰羿居窮石之地故以窮為國號賈逵曰羿之先祖世為先王射官帝嚳賜

羿弓矢淮南子天問皆言堯時有羿則羿是善射之號非復人之名字也夏本紀太康崩弟仲康立商書胤征云惟仲康肇位四海孔傳曰羿廢太康而立其弟仲康為天子則仲康乃羿之所立也故曰因夏民以代夏政窮國不知其處吳氏曰水經注窮水出于安豐昭二十七年楚與吳師遇于窮

鉏
見宋地

即此今在英山縣境詳見楚地

寒

襄四年羿用寒浞杜註北海平壽縣有寒亭臣謹按左傳寒浞伯明氏之讒子弟也伯明后寒棄

之夷羿收之浞行媚于內而施略於外外內咸服羿歸自田家衆殺之靡奔有鬲氏浞因羿室生澆及豷使澆用師滅斟灌及斟尋氏處澆於過處豷于戈靡自有鬲氏收二國之燼以滅浞而立少康

少康滅澆于過后杼滅豷於戈杜註靡夏遺臣事
羿者少康夏后相之子后杼少康子孔䟽伯明寒
君之名也哀元年伍員曰昔有過澆殺斟灌以伐
斟尋滅夏后相后緡方娠逃出自竇歸於有仍生
少康焉為仍牧正碁澆能戒之澆使椒求之逃奔
有虞為之庖正以除其害虞思于是妻之以二姚
邑諸綸有田一成有衆一旅能布其德而兆其謀
以收夏衆撫其官職使女艾謀澆使季杼誘豷遂
滅過戈復禹之績杜註椒澆臣夏后相仲康子失
國依于二斟后緡相妻有仍氏女虞舜後諸侯姚
姓思其名也女艾少康臣季杼即后杼也孔䟽云
澆因羿室而生澆澆已長大自能用師始滅后相
相死之後始生少康少康生杼杼又年長已堪誘
豷乃始滅澆而立少康計太康失邦及少康紹國
向有百載而史皆畧之臣愚以為有不盡然者孔
傳言羿立仲康杜註言相依二斟又竹書太康元

年帝即位居斟尋仲康五年征義和七年陟世子
相出居商丘帝相元年征畎夷七年于夷來賓八
年寒浞殺羿九年相居斟灌二十六年澆滅斟灌
二十七年澆伐斟鄩大戰於濰覆其舟滅之是仲
康自居斟鄩羿因而拒之據有夏都其身蓋未離
窮國也觀浞殺羿其子死於窮門則可以知矣據
襄四年傳靡先滅浞而立少康滅過滅戈乃在少
康既立之後哀元年以澆為主故以滅澆為復禹
之績參讀兩傳自明矣通鑑前編后相二十八歲
寒浞使其子澆弑王于帝丘少康生四十歲靡滅
寒浞蓋出於竹書及邵氏經世是可信也平壽漢
縣屬北海郡晉為濟南郡治高齊廢今其故城在
萊州府濰縣西南三十里寒亭在縣東北五十里
乃伯明所封浞見棄而歸羿未嘗居之也唐初有
寒水縣屬濰州武德六年廢即故寒亭矣今有
寒泥水北入海又掖水出縣東南之寒同山

有鬲氏

見上杜註有鬲國名今平原鬲縣臣謹按鬲偃姓皐陶之後封于鬲漢置鬲縣屬平原

郡後漢建武中封朱祐為侯邑晉宋仍屬平原郡後魏亦曰鬲縣屬平原郡後齊廢入安德縣今德

平縣東北一里有故鬲城

斟灌

見上杜註斟灌斟尋皆夏同姓諸侯桀安壽光縣東南有灌亭臣謹按漢壽光縣屬北海郡

應劭曰古斟灌國禹後今灌城是也師古曰斟音斟後漢改屬樂安國晉因之宋初省北齊復置隋

屬青州唐初屬萊州尋復屬青州今屬青州府縣東北四十里有斟灌城又有灌亭

斟尋

見上杜註北海平壽縣東南有斟亭臣謹按桀亦嘗居斟尋漢平壽縣屬北海郡應劭曰古

斟尋國禹後今斟亭是也漢又置斟縣亦屬北海郡後漢廢今濰縣西南五十里有斟城再按皇

甫謚謂斟尋在衛臣瓚
謂斟尋在河南皆誤

過

見上杜註過戈皆國名東萊掖縣北有過鄉臣
謹按掖縣齊為夜邑襄王益封田單以夜邑萬戶
是也漢置掖縣為東萊郡治後漢因之郡國志掖
縣有過鄉故過國後屢移治自後魏至今不復移
今仍為萊州府
治治北有過鄉

戈

見上杜註戈在宋鄭之間臣謹按孔疏哀十二
年傳曰宋鄭之間有陳地焉曰岳戈錫是也又見
宋地

偃陽

襄十年遂滅偃陽杜註偃陽妘姓國今彭城傅
陽縣也臣謹按偃陽穀梁作傅陽鄭語曰妘

姓郟鄩路偃陽此杜所本也漢傅陽縣屬楚國地
理志故偃陽國也師古曰偃音福後漢屬彭城國

晉因之東晉省入呂縣魏收志呂縣有徧陽地水經注祖水出于楚之祖地春秋襄公十年會吳於祖是也京相璠曰宋地今彭城徧陽縣西北有祖水溝去徧陽八十里此直以傅陽為徧陽益知二字通用矣祖杜曰楚地今見楚地中章懷太子曰徧陽故城在永縣南今在兗州府嶧縣南五十里永縣亦在嶧境

邾

襄十三年取邾杜註任城亢父縣有邾亭臣謹按邾公羊作詩左傳邾亂分為三師救邾遂取之後漢建武二年封劉隆為邾侯即此亢父秦縣漢因之屬東平國地理志有邾亭故詩國後漢屬任城國晉因之北齊廢今濟寧州南五十里有亢父城又有邾城在州東南水經注黃水逕亢父縣詩亭謂之桓公溝南至方與縣入于洶水

鑄

襄二十三年初臧宣叔娶于鑄杜註鑄國濟北蛇丘縣所治 臣謹按禮記武王未下車封帝堯之

後于鑄昭二十五年叔孫昭子從公於齊公使昭子自鑄歸水經注蛇水逕鑄城西春秋所謂蛇淵

園也杜言即縣為鑄國劉昭曰蛇丘縣有鑄鄉城又似非一處矣今寧陽西北有鑄城蛇丘縣詳見

魯地蛇

淵園

豕韋

襄二十四年傳曰在商為豕韋氏杜註豕韋國名東郡白馬縣東南有韋城 臣謹按此傳范

宣子自叙其先世曰昔勾之祖自虞以上為陶唐氏在夏為御龍氏在商為豕韋氏在周為唐杜氏晉主夏盟為范氏其詳則見于昭二十九年蔡墨之言曰昔颶叔安有裔子曰董父實甚好龍擾畜龍以事帝舜帝賜之姓曰董氏曰豢龍及夏孔甲帝賜之乘龍河漢各二各有雌雄孔甲不能食而

未獲秦龍氏陶唐氏既哀其後有劉累學擾龍于
秦龍氏以事孔甲能飲食之夏后嘉之賜氏曰御
龍以更承韋之後龍一雌死潛醢以食夏后夏后
享之既而使求之懼而遷於魯縣范氏其後也劉
累上承唐堯之後其族人居於大夏叔虞始封曰
唐人是因即此也說詳晉國都中不再贅及夏而
受氏曰御龍是已惟傳言夏時即更承韋之後而
宣子曰在商為承韋氏則其說稍曲杜註曰更代
也以劉累代彭姓之承常累尋遷魯縣承韋復國
至商而滅累之後世復承其國為承韋氏國語曰
祝融後八姓大彭承韋為商伯矣此累遷之後彭
姓復國之證也國語又曰彭姓彭祖承韋則商滅
之矣意此時劉累之後復當來居即宣子之言可
證矣蓋劉氏始焉代承韋於夏時繼復承承韋於
商世劉氏彭氏相繼更居承韋孔穎達以為舊無
此解出於元凱之創獲要亦無以易之也再攷竹

書劉累遷魯縣帝臯召丞韋復其國後與昆吾顧
俱附桀而湯伐之詩所謂韋顧既伐也竹書祖乙
命韋伯武丁征丞韋克之賈逵曰武丁滅丞韋以
劉累之後代之是杜氏之說亦當有所本矣韋孟
述祖詩曰丞韋之後哀周尚存戰國時曰坭津信
陵君曰秦有坭津以臨河內是也史記曹參至河
內下修武度園津徐廣曰東郡白馬有園津園常
同志曰河水至韋城名曰園津漢為白馬縣地隋
開皇十六年置韋城縣屬滑州唐因之大歷十一
年汴宋叛帥李靈曜為諸道兵所敗走至韋城永
平將杜如江追擒之五代漢末郭威為將士推戴
自澶州南趨汴至韋城宋亦為韋城縣仍屬滑景
德初契丹入寇車駕北廵駐於韋城金時縣圮于
水廢為常城鎮今在大名府滑縣東南五十里九
域志里

數同

魯縣

見上杜註魯縣今魯陽也臣謹按漢魯陽縣屬南陽郡地理志曰有魯山故魯縣御龍氏所

遷洧水所出東北至定陵入汝師古曰卽淮南子所云魯陽公與韓戰日返三舍者也晉仍為魯陽縣宋元嘉中省後魏復置又置魯陽郡周置魯州隋並廢縣屬襄城郡唐改為魯山縣屬汝州至今仍之有魯陽關堯時秦龍城

唐杜

見上杜註殷末豕豕國於唐周成王滅唐遷之於杜杜伯之子隰叔奔晉四世及士會食邑於

范杜今京兆杜縣臣謹按孔疏曰杜謂殷末豕豕國於唐者因見左傳言成王滅唐而封太叔知周初有唐國而無豕豕國劉累之子孫必且失其故封而竄徙於唐也言滅唐而遷之於杜者因見國語宣王時杜伯射王於郕知周有杜國而宣子連言唐杜必是唐滅之後更封於杜也又晉語訾

拓對范宣子曰昔隰叔子違周難于晉國生子與
為司空世及武子佐文襄為卿以受隨范韋註子
輿士為也武子士會也此又晉主夏盟為范氏之
解劉炫述賈逵之言曰成王封堯後為唐杜二國
譏杜遷唐于杜之說為非即司馬貞所云分唐之
遺民居于許郟之間為義陽之上唐者也詳見唐
國中以此為說亦無不可通矣秦始皇十一年置
杜縣亦曰下杜漢宣帝葬其地改曰杜陵置縣屬
京兆尹後漢建武二年延岑屯杜陵赤眉將逢安
擊岑岑大破之晉曰杜城縣後魏曰杜縣後周省
入萬年縣今杜陵故城在

西安府治東南十五里

胡

襄二十八年胡子朝于晉杜註汝陰縣西北有胡
城 臣謹按三十一年公薨立胡女敬歸之子子

野杜註胡歸姓之國昭四年楚子及胡子會於申
伐吳十三年靈王遷胡於荆平王復之二十三年

吳敗頓胡沈蔡陳許之師於難父胡子髡滅楚子使尹大心逆吳公子取于城父及胡田以與之杜註胡田取胡子之田也定四年公會諸侯及胡子於召陵侵楚十三年楚滅胡以胡子豹歸漢置汝陰縣屬汝南郡地理志曰故胡國高祖時封夏侯嬰為侯邑魏為汝陰郡治自是州郡皆治此宋秦始中没于魏置郢州隋仍之隋唐皆嘗置郡旋復為州宋置順昌軍旋升府金復為潁州元屬汝寧府以州治汝陰縣省入今仍之志云州有二城南城周五里故汝陰城也北城周四里故胡國城也二城相連並為州治

邶

見衛

鄘

見衛

鄆

襄二十九年吳公子札觀樂自鄆以下無譏馬杜註在滎陽密縣東北臣謹按孔疏鄆者古高辛

氏火正祝融之虛也國在禹貢豫州外方之北滎波之南居溱洧之間於漢則南郡密縣竟內有其

都也祝融之後分為八姓唯有熊姓為鄆國者處祝融之故地也鄆是小國世本無其號謚不知其

君何所名也鄭氏以為周王夷厲之時鄆公不務政事而好衣服大夫作羔裘之詩以刺之凡四篇

皆鄆風也其後鄭武公滅其國而處之僖三十三年鄭葬公子瑕于鄆城之下即其地也括地志故

鄆城在新鄭東北二十里今密縣東北五十里有鄆城

觀

昭元年趙孟曰王伯之令也著之制令過則有刑猶不可壺子是乎虞有三苗夏有觀扈商有姚邳

衛縣臣謹按觀夏同姓國也后啟五庶分封于

衛是為五觀竹書帝啟十一年放王季子武觀於西河十五年武觀以西河叛彭伯壽帥師征西河武觀來歸此即觀國不壹之事也戰國策周顯王元年齊伐魏取觀津高誘曰故觀邑也臨河津故曰觀津竹書梁惠成王二年齊田壽帥師伐趙圍觀津漢置畔觀縣屬東郡應劭曰夏國也後漢建武三年改封周後姬常于此曰衛國因為衛國縣晉屬頓丘郡隋改置觀成縣屬魏州唐省復置屬澶州宋屬開德府金屬開州元屬濮州今仍之古觀國城在縣西元和志觀城漢之觀縣平準書河決觀蓋亦嘗稱觀故杜氏云然

扈

見上杜註扈在始平鄠縣臣謹按書序啟與有扈戰于甘之野作甘誓孔傳扈與夏同姓楚語昭王使觀射父傅太子射父辭曰堯有丹朱舜有商均夏有觀扈周有管蔡是其恃親而不恭也知為

同姓矣史記云啟立有扈氏不服故伐之尚書疏堯舜受禪啟獨繼父以此不服淮南子曰有扈氏為義而不知義而不知宜也即其說矣秦改為鄆尚書疏扈鄆音同不知何故改也漢置鄆縣屬右扶風地理志古國夏啟所伐有扈谷亭晉屬始平郡後魏屬京兆郡今屬西安府古鄆城在鄆北二里又縣南五里有甘亭以在甘水之南而名即啟誓師處

妫

邳

見上杜註二國商諸侯邳即今下邳縣臣謹按竹書紀年商外壬元年邳人妫人叛河

宜甲五年妫人入於班方彭伯韋伯伐班方妫人來賓妫一作妫先典切說文云商諸侯為亂者考關邳見薛國此為亂之邳人蓋奚仲遷薛後繼處之者也

奄

見魯都

沈如蓐

黃

昭元年子產曰昔金天氏有裔子曰昧為玄冥師生允格臺駘臺駘

能業其官宣汾洮障大澤以處太原帝用嘉之封諸汾川沈如蓐黃實守其祀今晉主汾而滅之矣

杜註四國臺駘

之後 考闕

仍

昭四年夏桀為仍之會有緡叛之 臣謹按昭二十八年有仍氏生女黜黑而甚美樂正后夔取之生伯封實有豕心謂之封豕有窮后羿滅之夔是以不祀杜註封大也又哀元年事見寒國仍地考

闕

肅慎

昭九年王使唐桓伯辭于晉曰肅慎燕亳吾北土也杜註肅慎在玄菟北三千餘里 臣謹按

國語仲尼在陳有隼集于陳侯之庭而死楷矢貫之石砮其長尺有咫陳惠公使問仲尼仲尼曰隼

之來遠矣此肅慎氏之貢矢也昔武王克商肅慎氏貢楛矢石砮其長尺有咫先王欲昭全德之致遠也銘其楛曰肅慎氏之貢矢以分元女大姬配胡公而封諸陳君若使有司求諸故府其可得也使求得諸金積如之書序成王時息慎來賀王使榮伯賜息慎之命即肅慎也韋昭曰肅慎去扶餘千里孔疏玄菟在遼東北金為上京會寧府地今為

興京所屬

地

亳

見上孔疏曰亳當是近燕小國皇甫謐曰西夷之國約在今陝西北境

鮮虞

昭十二年晉伐鮮虞荀吳偽會齊師者假道于鮮虞遂入昔陽秋八月壬午滅肥以肥子綿

臯歸杜註鮮虞白狄別種在中山新市縣臣謹按鮮虞一曰中山司馬貞曰鮮虞姬姓國後漢志

子姓十三年傳曰鮮虞人聞晉師之悉起也而不
警邊又不設備晉荀吳自著雍以上軍侵鮮虞及
中人驅衝競大獲而歸孔疏晉侯從平丘會還聞
鮮虞不備使荀吳以上軍侵之非從本國去也定
三年鮮虞敗晉師於平中獲晉觀虎杜註平中晉
地今別見四年會於召陵將為蔡討楚荀寅曰水
潦方降中山不服棄盟取怨無損於楚而失中山
乃辭蔡侯杜註中山即鮮虞五年晉士鞅圍鮮虞
報觀虎之役也哀元年師及齊師衛孔圍鮮虞人
伐晉取棘蒲三年齊衛圍戚求援於中山四年晉
荀寅奔鮮虞齊會鮮虞人納荀寅於栢人六年晉
伐鮮虞討范氏之亂也蓋晉嘗竭力圖中山終春
秋之世不能取戰國策趙烈侯元年魏文侯假道
於趙攻中山魏世家曰文侯十七年使子擊守之
又秦甘茂曰魏文侯令樂羊攻中山三年拔之樂
羊反文侯示之謗書一箴即此事也趙武靈王曰

我國東有河薄洛之水與齊中山同之十年略中山地至寧葭二十一年攻中山合軍曲陽攻取丹丘華陽鳴之塞王軍取鄆石邑封龍東垣中山獻四邑以和惠文王三年滅中山遷其軍於膚施自是地屬趙漢置新市縣景帝封王棄之為侯邑屬中山國魏晉因之晉隆安初拓拔珪圍後燕中山城慕容麟出據新市後魏亦屬中山郡齊周因之隋大業初省入九門縣唐復置尋廢為新市鎮白居易言諸道村鎮冀不能過新市鎮今在真定府治西北四十里有鮮虞亭

中人

見上杜註中山望都縣西北有中人城臣謹按晉語及列子皆云趙襄子使新榘穉子攻翟勝左人中人史記趙敬侯伐中山戰于中人又趙孝成王七年齊田單將趙師取燕中都孔穎達曰即中人也蓋中山之邑嘗為燕所取但兩漢志皆云唐縣有中人亭唐縣在望都之西三十里漢時

皆屬中山國晉因之雖屬連壤不無小訛徐廣以為在唐縣之東北是也晉載記慕容垂都中山括地志王氏通釋皆以為即中人亭也今唐縣西北十三里峭嶺上有中山城

肥

見上杜註肥白狄也綿臯其君名鉅鹿下曲陽縣西有肥纍城臣謹按史記趙王遷三年秦攻赤

麗宜安李牧與戰于肥下却之孔氏曰戰于肥纍之下也漢置肥纍縣屬真定國地理志曰古肥子

國也後漢省魏收志藁城有肥纍即此城也今在藁城縣西南七里括地志同又漢志遼西有肥

如縣應劭曰肥子奔燕燕封之於此今為永平府盧龍縣又濟南府肥城縣亦相傳為肥子亡國後

居所

鼓

昭十五年晉荀吳帥師伐鮮虞圍鼓鼓人以城叛弗許力盡而後取之以鼓子戴鞮歸杜註鼓白狄

之別種鉅鹿下曲陽縣有鼓聚 臣謹按二十二
年傳曰晉之取鼓也既獻而反鼓子焉又叛於鮮
虞六月荀吳畧東陽使師偽糶者員甲以息於昔
陽之門外遂襲鼓滅之以鼓子戴鞮歸使涉陀守
之杜註獻獻於廟東陽晉之山東邑魏郡廣平以
北守守鼓之地涉陀晉大夫自此地屬於晉矣漢
置下曲陽縣屬鉅鹿郡師古曰常山有上曲陽故
此為下光武自薊南馳兼行至下曲陽既而自信
都攻下曲陽降之元和末皇甫嵩攻破黃巾張寶
於下曲陽是也晉屬趙國後魏改為曲陽縣高齊
縣廢入藁城即今晉州治西五里下曲陽
城是也其地有鼓城山以鼓子所居而名

昔陽

見上鮮虞條杜註昔陽肥國都樂平沾縣東南有
昔陽城又見上鼓條杜註昔陽故肥子所都

臣謹按漢沾縣屬上黨郡晉屬樂平郡地在太行
之東去中山絕遠孔疏曰杜以昔陽為肥國之都

曲陽之肥累城則是肥國取彼肥為名也劉炫非之曰齊在晉東偽會齊師當自晉而東行假道鮮虞遂入昔陽昔陽在鮮虞之東明矣樂平沾縣在中山新市西南數百里何假道東北而反入於西南乎傳本先言入昔陽別言減肥肥與昔陽不得為一昔陽既是肥都何以復言下曲陽有肥累之城是肥名取於彼乎肥小國境必不遠何肥名取于鉅鹿之城而建都則在樂平之縣也但據二十三年傳云荀吳使師偽糶者負甲以息于昔陽之門外遂襲鼓滅之則昔陽之為鼓都信矣是說也孔穎達嘗反覆辨之意在護杜展轉支離未言都縣移動古今不一安知昔之沾縣非即今之昔陽但肥都昔陽與鼓相近故既減肥國復從此襲鼓取之則依然折而入于劉矣蓋杜見減肥之文繫於入昔陽之後遂疑昔陽為肥都而不復詳其乘於襲鼓之傳至於沾縣昔陽之說必有所本當是

承襲舊話夫在前人也今按前漢志下曲陽注應
劭曰荀吳滅鼓今鼓聚昔陽亭是也後漢志則云
曲陽有鼓聚故翟鼓子國有昔陽亭是昔陽與鼓
亦有微分水經注曰白渠枝水自肥累東經昔陽
城南世謂之直陽城非也即鼓聚矣皆同劉說當
從之戰國時昔陽為齊地史記趙惠文王十六年
廉頗攻齊拔昔陽是也隋開皇十六年於此改置
昔陽縣十八年改為鼓城屬定州尋屬趙郡劉胸
曰北齊廢曲陽縣入藁城隋分藁城於下曲陽故
城東五里置昔陽縣尋改曰鼓城是也唐仍屬定
州武德五年幽州總管李藝引兵擊劉黑闥黑闥
遣其第十善拒戰於鼓城是也尋屬恒州宋屬祁
州金因之元置晉州明以州治鼓城縣省入屬真
定府今仍之又別有昔陽亭在州東南再按今
平定州樂平縣東五十里有昔陽城俗呼為
夕陽城即杜氏所云沾縣之昔陽城也應誤

房

昭十三年楚之滅蔡也靈王遣許胡沈道房申于荆杜註汝南吳防縣即防國臣謹按周昭王娶

於房曰房后即此房也漢吳房縣屬汝南郡孟康曰以楚封吳王弟夫槩於此故曰吳房夫槩事詳

見楚棠谿地後漢晉仍之兩漢晉志皆作房字杜作防傳寫之訛也魏為遂寧縣隋復故元和十二

年李愬攻吳房克其外城既平吳元濟遂改號曰遂平今仍之屬汝寧府

密須

昭十五年王謂藉談曰密須之鼓與其大路文所以大蒐也闕鞏之甲武所以克商也唐叔受

之以處參墟杜註密須姑姓國也在安定陰密縣臣謹按定四年祀鮑曰分唐叔以大路密須之

鼓闕鞏姑洗懷姓九宗職官五正命以唐誥而封於夏墟即此事也詩皇矣篇密人不共敢拒大邦

侵阮徂共毛傳密須氏也國語史蘇曰密須之亡由伯媯呂氏春秋曰密須之民自縛其主以與丈

王丈王得鼓路蓋在此時矣秦曰陰密史記秦遷
白起於陰密山漢置陰密縣屬安定郡地理志詩
密人國有囂安亭後漢省晉復置後魏屬平涼郡
隋省別置靈臺縣括地志陰密故城在安定縣東
鶉觚縣西其東接縣故城通考靈臺縣有陰密城
今在平涼府靈臺縣西五十里再考國語共王
遊涇上密康公從韋昭以為姬姓又僖十七年齊
桓公夫人密姬生懿公漢志河南郡有密縣臣瓚
曰姬姓國也與
陰密之密有別

闕鞏

見上杜註闕鞏之甲闕
鞏國所出甲也考闕

甲父

昭十六年齊侯伐徐徐徐人行成賂以甲父之鼎
杜註甲父古國名高平昌邑縣東南有甲父亭
臣謹按昌邑城在今充

州府金鄉縣北四十里

郟

見魯地
啟陽

鍾吾

昭二十八年吳公子燭庸奔鍾吾杜註鍾吾小國臣謹按三十年吳子使鍾吾執燭庸燭庸

奔楚冬吳子執鍾吾子益滅矣漢置司吾縣屬東海郡應劭曰古鍾吾國也後漢屬下邳郡晉屬臨淮郡宋為淮陵郡治元徽中改曰峒嵒縣昇明初復舊齊因之尋沒於後魏梁普通五年魏東海太守韋敬欣以司吾城來降是也今邳州宿遷縣西北有司吾鄉又縣北七十里有峒嵒山山下有峒

嶧

颯

見夢

鬲川

見夢

舒鳩

見舒國

離城

見舒國

荒浦

見舒國

桐

定二年桐叛楚吳子使舒鳩入誘楚人曰以師臨我我伐桐杜註廬江舒縣西南有桐鄉臣謹按

漢舒縣屬廬江郡後漢志舒縣有桐鄉古桐國也詳見舒國列仙傳桐君族譜曰楚東小國九域志

云楚附庸今舒城縣西南有桐鄉或曰安慶府桐城縣亦桐國地也

封父

定四年祝鮀曰分魯公以大旂夏后氏之璜封父之繁弱命以伯禽而封於少皞之墟杜

註封父古諸侯也臣謹按孔疏古者伐國遷其重器此繁弱封父之國為之不知何時滅而取之

孔叢云楚王張繁弱之弓載志歸之矢以射蛟於雲夢是繁弱為弓名也漢置封丘縣屬陳留郡後漢初平四年袁術屯封丘曹操自鄆城擊走之晉屬陳留國大興三年祖逖遣其將韓潛屯於此既而石勒遣石虎引兵南侵城封丘而還後魏仍屬陳留郡北齊省隋復置屬滑州唐屬汴州今屬開封府杜氏通典封丘古封國也

有虞

見陳國

倫

見陳國

昆吾

哀十七年衛侯夢於北宮見人登昆吾之觀被髮北面而噪曰登此昆吾之墟綿綿生之瓜杜

註衛有觀在於昆吾氏之虛今濮陽城中臣謹按國語祝融後八姓昆吾為夏伯矣又曰己姓昆

吾蘇顧溫董則夏滅之矣韋注昆吾祝融之孫陸
終第二子名樊為己姓封於昆吾昆吾衛是也昆
吾蘇顧溫董五國皆昆吾之後別封者皆其後詩
商頌韋顧既伐昆吾夏桀鄭箋顧昆吾皆己姓三
國黨於桀惡湯先伐韋顧克之昆吾夏桀則同時
誅也由此言之則昆吾滅於商與國語小異也昭
四年楚靈王曰昔我皇祖伯父昆吾舊許是宅杜
註陸終氏生六子長曰昆吾少曰季連季連楚子
祖故謂昆吾為伯父昆吾嘗居許地故曰舊許是
宅孔疏曰昆吾是楚遠祖之兄舊許在鄭昆吾墟
在衛二居未知孰為先後杜云昆吾為長子蓋本
楚世家韋云第二子亦小異也竹書仲康六年錫
昆吾命作伯帝癸元年昆吾氏出居許二十八年
昆吾會諸侯伐商三十一年為湯所滅然則昆吾
之滅乃桀黜之其後仍有昆吾者或復封或別封
嬖臣如劉累之代豕彘都不可知矣晉濮陽縣詳

見衛都隋析置昆吾縣尋省括地志昆吾臺在濮陽城西百步昆吾城在濮陽城西三十里舊許見鄭地 再按唐志范縣治昆吾城今見齊地又山西安邑縣有昆吾亭似皆誤

附無考地

折

桓十一年柔及宋公盟於折

女栗

文十年及蘇子盟於女栗

沓

文十三年公及衛侯盟於沓

儻句

昭二十五年儻句不余欺也

春秋地名攷畧卷十四